

皇明大政紀

皇明肅皇外史卷之二十一

涪川范守已謹輯

金谿閔師孔謹校

秣陵博古堂謹鐫

辛巳正德十有六年夏四月癸卯帝卽位。

帝興獻王子。憲宗純皇帝孫也。憲宗生十皇子。

長孝宗敬皇帝次興獻王次岐王益王衡王雍王

壽王汝王經王榮王弘治七年甲寅興獻王之國安

陸州正德二年秋八月帝生於興邸時黃河清慶雲

見翼軫分巳而獻王薨帝受敕嗣理國事至是年十

有五矣武宗無子臨崩遺詔曰朕紹承祖宗不業

十有七年。深惟有孤。先帝付託。惟在繼統得人。宗社生民有賴。皇考孝宗敬皇帝親弟。興獻王長子。厚。聰。明。仁。孝。德。器。夙。成。序。倫。當。立。遵。奉。祖。訓。兄。終。弟。及。之。文。告。于。宗。廟。請。于。慈。壽。皇。太。后。與。內。外。文。武。羣。臣。合。謀。同。辭。卽。日。遣。官。迎。取。來。京。嗣。皇。帝。位。時。十六年三月丙寅也。翌日丁卯。遣司禮監太監常霖。壽寧侯張鶴齡。駙馬都尉崔元。大學士梁儲。禮部尚書毛澄。齎詔諭金符之安陸州。戊寅。霖等至興邸。帝迎詔。國門外。至承運殿。開讀已。乃登座受符。朝藩衛諸臣。霖等。顧嘆曰。乃知帝王自有真也。四月壬午。帝辭興獻王園寢。顧瞻不忍去。從臣感泣。癸未。發安陸。辭。帝

母蔣妃嗚咽涕泗。帝母曰：吾見此行荷負重任，母輕言。帝曰：謹受教。比發安陸，父老攀戀不置。帝以藩衛官校不隸有司，恐爲沿途擾，特命從官駱安等嚴敕之所，過辭謝諸王供饋，屏絕有司珍奇之獻。行殿有過奢者，目不復眴。河有艤舟，父老跽曰：昔聖天子初生之歲，此河清三百里三日。嘗謂河清聖出，今果然矣。丁亥，禮部員外郎楊應魁上禮儀狀，請由東安門入居文華殿，翼日百官三上箋勸進。俟令旨，俞允。擇日卽位，乃大學士楊廷和命儀部郎中余才所擬也。壬寅，車駕至良鄉。帝覽禮部狀，謂長史袁宗皋曰：遺詔以吾嗣皇帝位，此狀云何？癸卯至京師，止城外。廷和固請如禮部

所具狀。帝不許。乃御行殿受箋。由大明門入。日中卽位。時久旱。是晨大雨。向午忽霽。萬象咸新。翌日詔曰。朕承皇天眷命。列聖洪休。奉皇兄大行皇帝遺詔。屬以倫序。入奉宗祧。祇告天地。宗廟。社稷。卽皇帝位。深思付託之重。實切兢業之懷。茲率由舊章。敬承先志。自惟涼德。方在冲年。尚賴親賢。共圖新治。其以明年爲嘉靖元年。凡正德間冒濫軍功。匠校。貢緣。監織。權稅諸弊。政盡行釐革。赦宥雜犯以下。末減有差。于是中外鼓舞。若獲更生矣。

丙午遣官往迎。帝母興獻妃。

初帝在中途。思聖母輒垂泣。故卽位三日。卽遣司禮

監官秦文鄒恩等齋筴往迎。

戊申命禮官集議崇祀興獻王典禮。

帝命集議興獻王主祀及追崇尊號禮部尚書毛澄請于大學士廷和廷和出漢定陶王宋濮王事授之曰此足爲據異議者卽效諛當誅矣。

出禮部侍郎王瓚于南京。

有待對公車舉人張璫者瓚同鄉士也詣瓚言帝入繼大統非爲人後與漢哀朱英不類瓚然之宣言于衆大學士廷和謂瓚獨持異議令言官列瓚他失出爲南京禮部侍郎而以侍讀學士汪俊代之。

梁儲致仕。

大學士梁儲乞致仕許之遂歸田里

五月以吏部侍郎袁宗皋爲禮部尚書兼文淵閣大學士
叅預機務

論扈從功也以長史袁宗皋爲吏部侍郎尋進尚書大
學士承奉張佐戴永爲御馬監太監護衛指揮駱安爲
錦衣衛指揮餘四十人俱增秩有差

策士于西角門

初武宗南巡故庾辰南宮所取士未對制策禮部上言
武宗在殯不宜于奉天殿策士乃就西角門以殺其典
是日發策卽日以追崇本生爲問士多依阿之

加故尚書韓文太子太保柱國任其一孫

先是召文赴官以老疾辭時年八十有一矣故遣行人存問加宮保柱國頒月祿養之仍廕一孫爲光祿寺寺丞

加章懋南京禮部尚書

時懋亦年逾八十加秩致仕令有司以時存問

六月以王守仁爲南京兵部尚書

時欲召用不果故有是命守仁因疏乞省墓矣

己亥復遣官往迎帝母興獻妃

遣太監戴永等齎箋再迎于途

建繫兵部尚書王瓊于詔獄謫戍榆林

初正德間都御史彭澤經略哈密貽土魯番速壇滿速

兒金綺器物易哈密城及金印。比城印未還而澤卽上言事平乞歸。朝廷信之。召澤還京理都察事。已而蒲速兒知我撤兵不還城及金印。更要索無已。且遣姦謀出入肅州。媾我諸屬夷爲中譎。兵備副使陳九疇偵知之。悉捕下獄。而阻其勞。賜不之發。蒲速兒怒。以萬騎寇肅州。遊擊將軍芮寧出禦。敗績。亡卒八百人。九疇嬰城自固。恐諸夷謀中變。捕裏甲者悉箠殺之。有哈密都督失拜烟答者。與蒲速兒通。九疇亦箠死。乃潛結瓦剌夷。伺掠其番落。破三城。蒲速兒狼狽引去。九疇軍從後邀之。斬獲頗多。時失拜烟答子米馬兒黑麻入貢在京。聞其父死。突入長安左門。鳴父冤。下錦衣衛法司會鞫。兵

部尚書王瓊乃發彭澤欺罔及九疇激變喪師狀逮繫九疇至京。廷鞠之。幾殺澤。大學士廷和營解得免。仍削籍九疇爲民。至是言官劾瓊挾私忌功。傾陷澤九疇。廷和素善澤。乃逮繫瓊。謫戍榆林。

起彭澤爲兵部尚書。

瓊旣論謫。乃復起彭澤爲兵部尚書。

敕修武宗實錄。命禮官集議追崇大禮。

初尚書毛澄會公卿臺諫等官六十餘人上議。漢成帝立定陶王爲嗣。而以楚王孫後定陶承其王祀。師丹以爲得禮。今上入繼大統。宜以益王子崇仁主後興國。其崇號則襲宋英故事。以孝宗爲考。興獻王及妃

爲皇叔父母。祭告上箋稱侄署名。而令崇仁王考。與
獻王叔益王。帝覽曰。父母可移易乎。其再議。于是大
學士廷和。及蔣冕毛紀等。復上言。程頤濮議。最得禮義
之正。皇上采而行之。可爲萬世法。興國祀事。今雖以
崇仁王異。日仍以皇次子後興國。而改崇仁爲親藩。
天理人情。庶兩無失。尚書澄侍郎俊等六十餘人。亦復
上議如廷和言。帝不聽。仍命博考典禮。以求至當。
已而廷和復上言。舜不追崇瞽瞍。漢世祖不追崇南頓
君。皇上取法二君。斯聖德無累。澄等七十餘人。又上
議。武宗皇帝。以神器授之。陛下有父道焉。特以昭
穆旣同。不可爲世。孝廟而上。稱祖曾高。以次加稱。豈

容異議。興獻王雖有罔極恩。斷不可以稱孝廟者。稱之也。因錄魏明帝詔文以上。留中不報。御史周宣進士屈儒侯廷訓亦各奏議如禮官指。帝終不從。仍命集議。

贈先朝諫死諸臣官任其子。

初正德己卯。武宗欲南巡。幸修撰舒芬等百有三十餘人。各抗疏諫止。忤旨逮繫二十餘人于詔獄。已而命長跪闕廷下。五日仍各廷朴之。死杖下者十有一人。員外郎陸震。行人司副余廷瓚。主事劉校何遵。評事林公黼。照磨劉鈺。行人孟陽李紹賢。劉平甫。李翰。臣詹軾。削籍五人。郎中黃輦。夏良勝。萬潮。博士陳九川。及陸震。成

邊一人徐鰲餘俱奪秩外補去。帝念其忠故有是命。死杖下者贈官廕其一子。戍邊削籍補外者俱錄用之。秋七月進士張璠上言大禮。

初羣議欲考孝宗璠獨不以爲然。自王瓚去頗不敢申其說。至是見帝屢駁羣議乃上疏曰。朝議欲上孝宗。叔興獻王此拘定陶濮王故事爾。夫漢哀宋英皆立爲皇嗣。養之官中。是尚爲人後者。故師丹司馬光之論猶可。今遺詔謂皇上倫序當立。不謂爲孝宗。後比之哀英較然不同。稱興獻王以皇叔父鬼神固不能無疑也。况稱聖母以皇叔母則當以君臣禮見。恐子終無臣母之義。故謂皇上繼統。武宗而尊崇。

其親則可。謂繼嗣。孝宗而自絕其親則不可。臣竊謂今日之禮宜別爲興獻王立廟京師。使得隆尊親之孝。且使母以子尊與父同斯興獻王不失其爲父。聖母不失其爲母矣。疏入。帝遣司禮監送閣中。諭廷和曰。此議實遵祖訓。據古禮。爾曹何得誤朕。廷和曰。書生焉知國體。復持入。帝熟覽之。喜曰。此論一出。吾父子可終完矣。是日帝御文華殿。召廷和冕紀入。諭曰。至親莫若父母。因授以手勅曰。卿等所言俱有見。第朕罔極之恩。無由報耳。今尊父爲興獻皇帝。母興獻皇后。祖母邵爲康壽皇太后。廷和退而上言曰。禮謂所後者爲父母。而以所生者爲伯父。父母蓋不啻降

其服又異其名也。臣等不敢阿諛順旨。封還手敕。帝爲中止。

八月查革冒濫武職。

初正德間安化謀逆仇鉞平之。太監張永攘爲己功。旣而谷大用馬永成陸闇魏彬等夤緣奏帶其弟侄張富張容谷大寬谷大亮馬山陸永魏英等俱封伯。其錄授都督都指揮者尤衆。帝卽位之初。卽詔查革諸冒濫款分。一十有三。一曰傳陞。二曰乞陞。三曰例外奏帶。四曰報効。五曰一人數處報功。六曰一時數處報功。七曰併功。八曰冒籍。九曰各邊不曾戰斬。巧立名目。十曰兵部擬賞。奉旨陞級。十一曰緝捕妖言姦細。一應陞級。

十二曰大同應州冒濫功次。十三曰納職加陞。命給事中夏言、御史鄭本公、兵部主事汪文盛覈之。言等奏：「命會覈錦衣等衛應革者二千一百九十九員名。簿錄奏上，因言正德間軍功之濫，其弊有三：奏帶之數太多，紀驗之次失實，武選之法盡壞。如鎮守官奏帶例宜五名，今至三、四百人，往往安居京師，寄名邊徼，有一人而數處奏名，一時而數方獲功者，其不在斬馘之例，又巧爲名目曰運送神鎗、曰齎執旗牌、曰衝鋒陷敵、曰軍前效勞。曰三次當先、紀驗無審覈之功。銓序無駁勘之實，其改正重陞、併功加授之類，不可枚舉，俱當釐正以絕弊源。事下兵部尚書彭澤復奏從之。先是錦衣衛額設指

揮使一。同知二。僉事三。鎮撫二。所千百戶各有定員。自正統後。貴妃尚主。公侯中貴子弟。當授官者。俱寄祿衛中。以材譜選用。遞進用事。正德間。諸貴倖子弟。以奏帶傳奏。冒銜者。不下數百人。他衛稱是。至是指揮而下。汰什之八。旗校汰什之五。歲省度支數十萬計。著爲典。勿得夤緣再進。然未幾而奏辯紛紛。倖門爲復開矣。

九月癸酉。興王妃至通州。

先是禮部具議。聖母至京。宜由東安門入。帝不從。再議由大明左門入。復不從。帝斷議由中門入。謁見太廟。朝議譁然不可。禮部復請用王妃儀仗。迓之。帝亦不從。命錦衣衛以母后駕儀往。又命所司製太

后法服伺之。至是聖母至通州。聞朝議欲考孝宗
志曰。安得以我子爲人之子。謂從官曰。爾曹已極寵榮。
獻王尊稱。胡猶未定。因畱通州不入。帝聞之涕泗。啟
慈壽皇太后。願避位奉母歸。羣臣惶懼。

袁宗臯卒。起費宏爲吏部尚書。兼華蓋殿大學士。叅預機
務。

初正德辛未。宏由禮部尚書入閣。歷太子太保。武英殿
大學士。甲戌歲致仕家居者七年。至是袁宗臯卒。廷和
奏復起之。

冬十月。張璁上大禮或問。

初璁上言大禮。御史盧瓊給事中史于光交章劾璁。惑

亂宸聽宜加斥罰不報已而禮官復集羣議上言不當帝后其所生留中不下于是毛澄等以璵于光言上請乞戒諭璵亦不報九月丙子帝諭廷和曰朕父獨生朕不得承緒復不得徽稱罔極何由報終勞卿等折衷伸朕孝思廷和等仍守前議不欲變及聖母留通州不入帝欲避位璵乃復爲或問一帙辯折統嗣之異及尊崇墓廟之說甚悉吏部主事彭澤錄遺內閣及禮官勸改前議不從璵乃齋至左順門上之廷和令修撰楊維璵等阻之不得帝覽之留中不下

辛巳尊邵貴妃爲皇太后興獻王興獻妃爲帝后廷和見勢不獲已乃草赦下禮部曰聖母慈壽皇太

后懿旨。以朕續承大統。本生父 興獻王宜稱 興獻帝。母宜稱 興獻后。 獻廟貴妃邵氏稱皇太后。仰承慈命。不敢固違。帝從之。廷和意假母后示。非廷議意也。

壬午。興獻后至自通州。

聖母以未得徽稱。留通州者彌旬。至是乃如京。由大明中門入。帝迎于闕內。朝議不謁。太廟止見奉先奉慈二殿而已。

乙酉。主事霍韜等上言大禮

兵部主事霍韜見璵言欲用。亦上言禮官持議非是。時同知馬時中。國子監諸生何淵。巡檢房濬各上言如璵

議。帝益爲之心動矣。

論曰。夫人諛勢而佞權。恒情爾。于是時秉臣執國是矣。矻然不移。而璉以孤議獨衡其間。言出而扞扶隨之力。孰與秉政競也。顧么麼如淵濬者。俱從而和其說。豈真是所在。勢與權莫之能奪耶。嗚呼。良賈弗售。人爭去之。況未必良乎。覘所易售而居之求鬻。尤人情也。無異乎淵濬之諛。不干彼而于此也。

甲午。諭加 皇太后及 興獻帝后尊號。

廷和以追崇禮成。擬上 慈壽皇后及 武宗皇后尊號。帝因遣司禮監諭廷和曰。邵太后 興獻帝后亦各擬上尊號。廷和等上言不可。宜俟明年 大婚禮。

成慶宮闢加之可也。

甲戌乾清宮成。

初正德甲戌正月乾清宮災。至是始成。帝自文華殿入居之。

以何孟春爲吏部侍郎。

時孟春爲都御史巡撫雲南。先上疏乞重天命以興聖治。勸帝修德勤政。知人親賢。帝嘉納之。至是又上言。竊見進士屈儒。上言欲尊聖祖母爲太皇太妃。聖父爲皇叔考。興獻大王。聖母爲皇叔母。興獻大王妃。所云考字臣愚不能無疑。禮有世父母叔父母之文。而無世叔考妣之說。宋真宗稱太祖爲伯考。是興王業。

獲尊位者也。則皇叔考之稱。豈可加于興獻王乎。成王謂周公爲叔父。是生稱之辭。旣沒。未有稱叔父者。則皇叔父之稱。其可復加已諡之親王乎。臣伏覲詔書。陛下稱先皇帝爲皇兄。議于興獻王稱皇叔。亦允愜矣。若非古之名不正之號。非臣所望于今日也。廷和覽疏。以爲有見。乃擢孟春吏部侍郎。

出給事中熊浹爲僉事。

浹上言。皇上貴爲天子。聖父聖母。以諸王禮處之安乎。臣以爲當稱帝后而祀。興獻于別廟。則大統之義所生之恩。斯兼盡矣。乃出爲按察司僉事。浹大學士費宏鄉人也。宏慮廷和疑已故出之。

十一月。封王守仁爲新建伯。

初。守仁擒宸濠諸姦佞。江彬等導帝親征。且欲攘守仁功。詭言曲譖百計。欲去之。宸濠伏誅。守仁以已得專制平逆。皆兵部尚書王瓊力。乃歸功瓊。執政者不悅。瓊亦因以忌守仁。久之不行賞。至是。帝念守仁功。命兵部集議。差別諸從。戎功次。封守仁新建伯。特進光祿大夫。柱國。仍兼南京兵部尚書。叅贊機務。歲祿千石。給誥。叅子孫世襲。守仁聞命。疏辭。因言。楊廷和王瓊有發縱之功。伍文定。邢洵。戴德孺。陳槐。曾璵。胡堯元。劉源清。馬津。南橋。李楫。顧似。劉守緒等。及鄉縉王懋中。鄒守益。伍希儒。謝源等。有摧降。遮擊。贊議。監錄之功。尚未酬叙。

而舉人龔元亨爲臣說濠構死獄中。尤爲含冤不報。久之乃擢伍文定副都御史。任一子。邢珣。徐璉。戴德。儒擢布政使。餘不叙。

十有二月。除張璉南京刑部主事。

先是帝下大禮。或問于禮部。時楊一清家居。遺書吏部尚書喬宇曰。張生此論。聖人不易。恐終當從之。宇不聽。至是廷和銜璉授意吏部。除爲南京主事。尚書石琚語璉曰。慎之大禮說終當行也。廷和寄語曰。子不應南官。第靜處之。勿復爲大禮說難我耳。璉軼軼而去。

起林俊爲工部尚書。

初俊爲都御史致仕家居。廷和寓書于俊。以定國是。俊

上疏曰孔子謂觀過知仁陛下大禮未協過于孝故爾司馬光有言秦漢而下入繼大統或尊崇其所生皆取譏當時貽笑後世陛下純德何忍襲爲疏入留中廷和遂奏起俊力辭不聽

論曰書稱唯辟作威福何云乎唯也言不得干其秉爾威福自下而大秉移矣于是信孟春絀浹及璫而登俊果帝意耶窺帝所欲絀信必有在此不在彼者而當事者互爲之事與人主競秉者不保于庸闇之主而况英明如肅皇耶所爭卽是猶嫌無君况以同異私衷黨伐其間乎此其終激而爲後日之紛紛也

大學士楊廷和蔣冕毛紀費宏俱求罷歸

先是帝下御劄諭加興獻帝后以皇字。廷和等上言恐紊一代綱常。拂萬世公論。不可因封還御劄。帝曰。卿言已悉。第罔極之恩。報亦無方。其勉承朕命。稱父興獻皇帝。母興獻太皇后。廷和等復上言。興獻帝后尊稱已極。若復加皇字。與孝廟慈壽並尊。是忘所後而重本生。任私恩而棄大義。臣等不能辭責。俱願罷歸。帝曰。朕奉昊天至情。不必拘于史志。可勉加皇字。母託爲辭。于是吏部尚書喬宇率百官上言。皇字不可加。帝曰。慈壽皇太后懿旨。有諭。皇帝婚禮將行。其加興獻帝后皇字。朕不敢辭。爾羣臣其承。后命。廷和等見不可爭。乃俱求罷歸。不報。禮部尚書毛澄

侍郎賈詠汪俊等上言若帝后之上有加則正統之親無別恐不可以告郊廟而布天下內閣大臣直言規諫宜賜俞旨帝不聽仍曰宜遵懿旨稱興獻皇帝興獻皇太后于是給事中朱鳴陽等御史程昌等編修陳沂等百有餘人各上言加稱非是因請斥璉不聽

甘肅總兵官李隆陰嗾戍卒殺巡撫都御史許銘

初銘至甘肅斤斤自好敕鎮巡諸官勿得侵牟士卒隆以同里故滋不悅旣而議減諸戍卒月餉三之一士心亦多怨之隆遂陰嗾諸卒王禮二等倡言幕府減損糧餉不恤士伍當執而報之乃嘯聚數千人擁入臺署假

言告復原餉謹諄不已銘倉卒避匿禮二等羣粹盜毆而歿復撒窓櫺諸木裹屍而焚之劫軍械獄囚燔燒寺廨城中大震鎮守太監董文忠聞變急擒禮二鞫之禮二對簿發隆喉使陰謀聞之恐急索禮二梟斬以徇且圖滅口復喉軍胥蘇秀等誣銘貪殘剋餉激變邊卒疏聞于朝太監董文忠亦隨聲和之于是巡按甘肅御史許鳳翔巡按陝西御史喻茂堅各上其事

壬午嘉靖元年春正月

己未郊清寧宮小室火考

孝宗皇帝母

慈壽皇太后

時郊祀甫畢清寧宮小失火風急不可撲滅大學士楊廷和等因上言火起風烈殆爲天意况迫清寧後殿豈

非興獻帝后之加稱。祖宗神靈容有未悅者乎。給事中鄧繼曾上言五行火主禮。今日之禮名紊言逸。陰極變災。臣雖愚。知爲廢禮之應也。主事高尚賢上言郊祀甫畢。卽有清寧後官之災。意者興獻帝后之稱于禮不能無疑。後以皇字稱之。尤爲過越。鄭佐亦言鬱攸之災。不干他官。而于清寧之後。不在他日。而在郊祀之餘。變豈虛生。災有由召。帝覽之心動。乃從廷和等議。稱孝宗爲皇考。慈壽皇太后爲聖母。興獻帝后爲本生父母。而皇字不復加矣。

附錄初 帝卽位。裁抑佞幸。諸途俱清。亡何興邸舊僚。夤緣遷叙。至庖匠廝役。多寄祿錦衣衛。階資廕叙。殆數

百人而 皇太后親屬邵喜等狎恃恩寵請乞無厭其
舊閣蕭敬等仍留大內所勅寺觀奪民產先降 明旨
撤黜歸民者仍 命如舊存葺諸臣抗章屢以爲言留
中不省而左右近習頗時時有所移易于是給事中朱
鳴陽因災上疏曰切見是月十一日清寧後室火雖曰
小災實關大體臣反覆思惟妄意揣度典禮失中與直
言廢棄與爵賞大濫與刑法縱失與外戚驕盈與近幸
干政與有一于此皆足召災况茲數愆各有指驗昔孔
子聞魯災知爲釐宮踰禮故也漢傳太后欲與成母等
號火焚其居鴻寧殿今茲之火切近清寧豈非大禮不
可踰而人言所當恤耶致警惕之誠以圖消弭之道此

其尤爲先務也。大本旣端，餘弊當救。聖明御極，言路始開。近日以來，聽納漸倦，持逆心之論，厭而不從，爭大禮之章，留中不報。昔人謂正士道消，則火。此其一也。裁絀冒濫，明詔方行，而冗流競進，倖隙復開。文希京官，武圖世及，皆藉興邸爲辭。所謂放賢淫賞，官非其人，則火。此又其一也。權姦亂政，天下忿心，撓法曲全，重違物論。所謂滅棄法律，則火。此又其一也。明君之於外戚，慎始防微，而指揮邵喜，賞賚過多。恩寵太盛，所謂外戚無功受寵，則火。此又其一也。綸音之布，所以示大信于天下，而倭倖間得轉移，聰明時有惑蔽，一事之予奪，前後互異，一人之罪宥，變更不一。如近日傳奉鎮守

主于何人。擬條意。旨不由內閣。治亂攸係。豈宜潛移。所謂貴近驕溢則火。此又其一也。然此數者皆典禮失中。所致。蓋禮既徇私。而直言者始不見用。希進者恃藩邸之私。而冒濫始多。亂政者恃調護之私。而大法始廢。外戚恃官掖之私。始妄請求。貴近恃逢迎之私。始得干預。孔子名不正之論。至是無乃驗矣。惟皇上仰畏天變。俯恤人言。推災之所自起。以端其大本。而釐其羣弊。庶足以回天意矣。疏人不報。

以故副使陳九疇爲僉都御史。巡撫甘肅。

初九疇爲王瓊所構。論死繫刑部獄數年。及瓊謫戍彭澤。起入兵部。久欲理九疇。未之及也。至是甘州事聞。

廷舉代許銘者衆以九疇名上。帝從之。乃以九疇爲僉都御史。以往兵科都給事中許復禮御史王應鵬等各上言。許銘被殺而隆等無恙。必有陰謀。嗾使者乞遣法司臺諫官案問。及實覈所失。穀穀軍械下兵部議。彭澤以爲宜檄巡按御史案覈。仍趣九疇亟往體察之。已而巡按陝西御史喻茂堅移牘都察院言。許銘欲振綱紀而撫馭少恩。禁戢總鎮諸官。寅恭未協。隆等雖無故縱陰謀。難免嫁禍之罪。首惡王禮二等已經梟斬。同亂六十餘人。俱各囚禁。第志在得餉。原無他謀。合免根究以安人心。彭澤復奏以爲隆等宜加切責。戴罪視事。帝從之。乃降敕切責隆及副總兵李義守備支勇太監。

董文忠等趣九疇公行覈報

革監督諸倉閘人

自宣德末京通二倉置總督閘宦一人後夤緣滋多所居號中瑞館請置印記漕輓軍民橫被索求不堪其擾臨清徐州淮安諸倉亦各置監督一人紛擾尤甚至是戶部尚書孫交上言取諸閘人還京別用革中瑞館及各官署帝從之中外怡然

發內外府諸金分餉諸邊

兵部尚書彭澤因甘肅之變奏發內府及太倉積金及太僕寺馬價共三十萬兩分運諸邊補給士卒廩餉從之

馬平盜起平之

廣西馬平府融縣盜周克亮等嘯聚萬餘人。僭署名號。流劫鄉落。居民總督都御史張嶺以其狀聞。兵部覆奏。敕嶺徵兵勦平。奏報久之乃平。

二月詳定朝參禮儀

禮部奏定朝參諸儀。凡入門進班奏啟復命及齋戒忌辰令節予告日期以及御史鴻臚官疏糾各禮。明示遵守從之。

附錄大能仁寺妖僧齊瑞行。自正德間。黃緣佞倖冒領璽書及金印。賞賚不貲。工部侍郎趙璜奏乞簿錄其財沒官。從之。其玄明宮保安寺諸處所繪諸像刮取金屑。

一千三十餘兩俱發商販以償夙負

存問故大學士王鏊

初鏊爲少傅兼太子太傅戶部尚書武英殿大學士致仕家居帝降特敕遣行人柯維熊卽家存問之并優眷鏊疏謝因上講學親政二事凡數千言帝嘉納之

三月丁巳加上慈壽皇太后爲興國太后

奉上慈壽冊寶號曰昭聖慈壽皇太后毅皇后曰莊肅皇后翌日奉上邵太后尊號曰壽安皇太后興國后興國太后壬戌布詔天下曰自古帝王以孝治天下尊親之禮其來遠矣仰惟聖母慈壽皇太后敬相皇考孝宗皇帝訓育朕兄毅皇帝對有顯問

皇嫂皇后表正宮闈母儀有年。重念聖母貴妃事我
憲祖澤隆。啟佑本生父興獻王。聰明仁孝。本生母
興獻王妃莊敬儉勤。誕育眇躬。丕承前列。謹奉冊寶上
聖母尊號曰昭聖慈壽皇太后。皇嫂曰莊肅皇后。
又奉聖母懿旨上聖祖母尊號曰壽安皇太后。
本生父曰興獻帝。母曰興國太后。大禮既舉。洪恩
誕敷。先是司禮監傳諭興獻帝冊文。朕宜稱子。廷和
等上言不可。復傳諭宜稱孝子。廷和等復言冊文稱長
子。本生之情自明。請勉從正禮。從之。故其冊詔若此。
戊辰遣官詣安陸上興獻帝尊號。

遣司禮監太監溫祥督禮儀。成國公朱輔上冊寶。禮部

侍郎賈詠題神主詠遵廷和指題其主曰 興獻帝神主不稱考及叔亦不叙子名

敕封大學士楊廷和蔣冕毛紀及指揮邵喜蔣輪爲伯駙馬都尉崔元爲侯

帝念翊戴功敕下吏兵兩部議封廷和冕紀爲伯給誥券子孫世襲歲祿千石仍各任一子世錦衣衛指揮駙馬崔元進爵爲侯 壽安皇太后弟指揮邵喜 興國太后弟指揮蔣輪各封伯大學士費宏亦任一子與廷和子等毛澤加太子太傅任一子世錦衣衛指揮同知壽寧侯張鶴齡加太師歲增祿米三百石太監張錦扶安溫祥賴義秦文張欽張淮蕭敬黃偉鮑忠各增歲祿

任弟侄一人爲錦衣指揮使僉同等官。其興邸承奉等官。張佐。董英。戴永。張忠。閻洪。趙山等二十七人俱已授太監。仍各增祿。任其弟侄惠安伯張偉。侍郎鄭宗仁。趙璜。建昌侯張延齡。慶陽伯夏臣各加歲祿。進階其餘府部院寺諸掌印官及各臺諫官各賜金繒有差。于是給事中張九叙。御史汪淵等各上疏諫止。不報。

山東礦寇王堂流劫歸德諸處。

初王堂嘯聚萬餘人。劫掠山東曹單諸郡邑。官兵不能制。流入河南歸德府柘城諸縣。焚殺居民無算。久之乃平。

西海虜併洮河諸夷。

初正德己巳。北虜太師亦不剌。仇殺虜酋小王子。其子欲報之。亦不刺懼。與阿你秃。厮等擁衆數萬。走涼州。乞我閒地主牧守。將不敢許。積十餘日。亦不刺大掠堡砦。往西寧外境去。亡何。攻破安定王諸族。掠其誥印。遂盤據西海。日漸陸梁。西海之有虜。自此始至。是亦不刺之子麻八台。侵破諸番落。兼有西土。列咂。眼班。板丹。打力諸部。俱爲所併。漸掠西境。給事中張翀上言。臣惟前項番落。南距松藩。西跨甘肅。周匝數千里。諸部種殷。盛生齒繁。滋我國家。縻以爵賞。啖以茶利。蓋不獨爲互市之資。實賴其有肘腋之助。此古人斷匈奴右臂意也。今皆併于黠虜。萬一豕突狼驅。踰秦隴。則可以窺關中。出

隋文則可以向劍外。此膏肓之疾不容諱者也。昔吐谷
渾遼東鮮卑也。初以百戶西附陰山。并諸寇而有之。遂
爲隋唐歷世之患。況此虜定有巢穴。擅強富之。種落平
苟不急處以杜其漸。臣恐爲患未艾也。下其章于兵部
狎蜀人也。

附錄時甘州亂。卒未有處。諸邊倣尤驕縱。頗甚。宣府鎮
卒遂因探閱點視。謹譁奔潰。事聞。給事中許復禮上言。
近者廣西蠻寇河南礦賊。洮河點虜。並肆陸梁。敕各總
督總兵等官。遇截擒勦。而乃玩愒失事者。實由邇來政
多寬假。事尚姑息。權姦有罪而輕宥。豪卒干紀而不誅。
近日甘州之變。廟堂曲原而宣府輒敢倣尤矣。乞 敕

議畫一之法。以爲把握制馭之權可也。下其章于兵部。工部侍郎趙瑱奏革惜薪司加耗柴炭從之。

命覈漕運軍艇。

戶部尚書孫交、兵部尚書彭澤會言：國家歲漕四百萬石，領運則十有二總，其領衛所一百有四十，爲軍旗十有二萬六千八百人，計駕淺船萬有二千一百四十餘艘。近者漕規盡弛，軍亡船散，恐非國家大計。帝命總督都御史覈實整飭之。

夏四月，吳淞江訖工。

先是，廷臣言東南水利以吳淞江白茆港爲首，乞設官顧治之。乃以巡撫蘇松都御史李克嗣爲工部尚書，便

宜從事興工于辛巳十月。至是訖工。凡爲工十有一萬二千五十三。前後閱七月云。

五月罷封楊廷和蔣冕毛紀伯爵。

初帝降敕封廷和等爲伯。給事中張九叙上言。陛下人奉皇考。孝宗皇帝之祀。爲萬方民物之主。旣親且長。倫序最正。天與人歸。不約而和。廷和等特以戢事奉命視草。實遵我皇祖之明訓。非擬之而後定也。陛下以爲元功。封伯世傳。恐非廷和等所敢當。費宏起廢贊政。遇亦奇矣。若廕子世及。亦爲過望。駙馬都尉崔元太。傳壽寧侯張鶴齡。禮部尚書毛澄承事奔走。亦其戕也。前者賞金各十兩束幣四十。論者方以爲濫。及而

况封元爲世侯加鶴齡以太師加澄太子太傅而且廕子錦衣乎。漢之內寺有定立順之功。叅建桓之策者而紀綱大壞。唐有門生天子定策國老之名。禍不可言。陛下聖德隆興。非若漢唐之主也。何以太監張錦爲預迎立而欲廕其弟任耶。又何以太監扶安溫祥賴義張欽等贊襄大計而欲增祿世廕耶。至若從事藩邸諸閣張佐戴永張忠陳宣閻洪趙山黃錦李雲等二十七人。幸遇際會俱推太監諸戕。麟服玉帶榮已極矣而加祿世廕則冒濫尤甚。誠非古帝王立法自近之意也。御史汪淵等亦上言。陛下之有天下。倫序當然。人心其屬私議無所加。大學士廷和等何與定策。太監張佐等何

與贊襄駙馬崔元等之捧敕迎立太監張佐等之藩邸
效勞惠安伯張偉等之督兵迎護皆臣子奉職之常也
何足爲功侯伯非開國之臣不可封錦衣官非汗馬之
勞不可授而官爵可及于爛羊祿賞反輕于敝袴乎主
事霍韜亦上言據律文官不得封公侯祖宗時學士典
文章備顧問而已無有封伯與武廕者徐有功封武功
伯隨禡之乃明鑒也陛下忍令史官書曰學士封伯
自今始乎于是廷和冕紀乃上疏懇辭俱下兵部尚書
彭澤復奏正德間權姦用事朕官冒濫陛下起而釐
之削除殆盡及論定策之功乃封爵恩廕至五十三人
非初意矣廷和等既有疏辭當體念俯從量加別恩

帝從之。命各別議。賤銜及更廕一子。四品文賤官。于是封崔元爲京山侯。邵喜爲昌化伯。蔣輪爲玉田伯。各世襲食祿有差。

以林俊爲刑部尚書。

先是起俊爲工部尚書。改刑部尚書。用甚殷。

附錄治中王槐上議。宜置安陸祠祭署。以外戚蔣榮主行祀事。帝從之。給事中底蘊力言不可。乞立崇仁王爲興國後。于是臺諫官交章贊行。蘊議禮部亦言之。俱不報。槐議亦寢。

復置密雲兵備官。

初永樂間遷太寧都司于保定。設朶顏等三衛。羈縻夷

衆復設密雲兵備官以按察司副使領之以防不虞正德中鎮守關人惡其不便已也詭詞奏革至是巡按御史王鈞疏言宜復下兵部覆議從之

詔任劉健謝遷各一子

帝念大學士健遷忠直特命各任一子爲中書舍人六月禁閹人弟侄授錦衣官

從彭澤奏也著令勿得陳乞以撓國事

虜人寧夏塞大掠固原平涼涇州諸處指揮楊洪百戶劉端禦虜死之

套虜二萬餘騎自井兒堡撤墻深入固原平涼直抵涇州殺掠無算指揮楊洪百戶劉端出禦被殺旬日乃去

總制侍郎李鉞奏聞。敕鉞嚴加防禦。切責總兵官劉玉。朱鑾等。令戴罪逐虜。兵部尚書彭澤見邊備弛甚。乃上言曰。方今邊警日急。而左都御史金獻民。副都御史王懋中。大理寺卿鄭岳。表率百僚。輔翊新政。新建伯王守仁。初值父喪。哀痛方切。俱難任使。故大學士楊一清。曾任密勿。不當更典兵戎。唯臣淺學粗才。猶堪奔走。請假巡視邊務名目。前去各邊會同總制提督等官。將各糧餉邊防從實料理。帝降溫旨留之。

附錄編修湛若水見 帝以暑月輟經筵。乃上疏豫戒遊逸。以謹君德。且曰。願 聖明常以端居靜思爲本。以溫習尋求爲業。以敬親事天爲職分。以勤政親賢爲急。

務隨處操存。體認天理。俾此心無異于經筵日講之時。稍萌逸欲。卽爲禁止。又曰舊德老臣如楊廷和等。宿望如孫交林俊等。及九卿大臣。時賜召問。以興其敬畏之心。尤擇內臣之老成忠厚者。給侍左右。以取承弼之益。帝嘉納之。

秋七月。南京大雨水。

是月朔。風雨暴至。江水俱溢。傾陷居民數十百家。城垣宮闕頽圯頗多。守臣以聞。帝諭南京羣臣同加修省。停免安陸州起運糧稅。及安陸衛徵發官卒。

戶部奏言安陸州及京山縣糧稅。始自元年。宜停免起運。畱克守陵官卒祿廩。及營葺陵寢支用。其安陸衛官

卒。原發廣西備種一百六十餘名。亦宜留護城隍拱衛陵寢從之。

八月封乳母劉氏宮媼魏氏高氏顧氏邢氏爲夫人。

司禮監傳諭封劉氏爲奉聖夫人魏氏爲輔聖夫人孫氏等各爲夫人給事中底蘊上言宜寢孫氏等不報。

黃鞏卒。

鞏字伯固莆田人正德間爲郎中諫止巡幸廷朴之削籍爲民嘉靖初起爲南京大理寺丞至是入賀聖壽卒于京邸吏部奏贈大理少卿從之。

九月辛未立皇后陳氏。

附錄副都御史劉玉奏濠妃婁氏親族助淫罪在不赦。

而廣信知府周朝佐勘問失出。未盡其事。帝怒。奪朝佐官四級。遷地序用。其婁星等各遣戍邊。婁愉等削籍爲民。

冬十月。敕覈畿內皇莊及勲戚田土。

初給事中底蘊疏請查處。皇莊下戶部議行撫按官按覈已而特敕給事中夏言御史樊繼祖戶部主事張希尹會同撫按官親詣地方。用心勘覈。凡正德元年以後投獻及侵占者。盡數還民。召佃。管莊人員悉取還京。其租稅照則折納。令管屯僉事兼理之。係皇莊者解部類進。勲戚者解部關領。不得自行收受。已而言等會同順天保定各巡撫孟春周季鳳巡按王琳宋鉞等勘

出各項田莊共計二十萬九百一十九頃二十八畝。其
侵占民田二萬二百二十九頃二十八畝。俱令還民。言
等又以原敕係皇莊者。解部類進。猶非國體所宜。乃
復上疏詳述皇莊創立之始。及莊甲武斷。招剋之害。
因及皇店皇鹽罔利之非。乞併掃除。以洗累朝之弊。垂
百代之休。帝從之。令改皇莊爲官地云。

附錄給事中儲昱上言。先年看守神木。歲役衛卒十有
五人。歲計月廩七十五石。自迎瑾用事。受姦卒陳志賄
通。奏置神木千戶所。設卒四十餘人。歲食月廩一萬三
千四百餘石。坐耗國儲。莫此爲甚。宜加裁省。并置陳志
于理。下兵部覆議從之。

巡視京倉御史向信上言。領運官卒歲運漕米四百萬石。石加耗金不一。共計四十七萬餘兩。總漕衙門驗及至京通二倉。徑由領運官支給。臣等無從稽按。必多侵牟。宜令各衛簿錄示臣。按目支發。下戶部覆議。帝從之。

禁異學

給事中章僑御史梁世驃各條奏。三代而下。道學之傳。至朱熹大明。近世倡爲異論者。以陸九淵爲簡。迨朱熹爲支離。宜行嚴禁。以正士習。下禮部覆議。以爲二臣之言有補風教。帝曰。祖宗表章六經。敕從正學。欲以成光明正大之業。近年士習詭異。文辭艱險。有傷治化。

其行督學官榜諭禁之。

禁百官交通先朝閣人。

初正德間。逆瑾用事。其黨谷大用。魏彬。張永等相繼煽亂。社稷幾危。帝卽位。俱屏黜之。大用與丘聚俱奪俸。發孝陵司香。其司禮監太監蕭敬仍畱在監。言官屢請誅敬不報。已而興邸舊閹閻洪。戴永等漸次顯移。有小監吳良。善侵牟內帑。事聞。帝命置之于理。司禮監具幅揭以請。有旨免鞫。御史汪良貴抗論不報。先是。詔書款開。騰驤等衛勇士替補。俱開送兵部查驗。方得收廩。御馬監等處馬匹牛羊。俱令巡視科道官備覈數目。以防冒濫。旣而御馬監太監閻洪不遵前詔。奏取

中旨免覈兵部尚書彭澤上言騰驤四衛勇士旗卒仍
宜照例驗覈以杜冗食及將各監官逮訊重治不報
事中邵錫等六科上言御馬監及壩上十九馬房虛增
馬數冒靡芻粟仍宜遵 詔查覈以省虛靡併將閫洪
禡職亦不報至是南京各處奏報災異 帝命羣臣同
加修省給事中毛玉因上言先事之失後事之戒鑒其
失而不戒是蹈覆車之轍也可不懼哉往者逆瑾擅專
紊亂朝政惡黨谷大用魏彬張永等聲勢相倚氣焰熏
灼權移人主威脅人心而張銳張忠干經張雄蘇縉孫
和劉養之徒相繼進用彼此效尤馴致錯濠寧彬之亂
宗社幾危 皇上繼祛宿弊革故鼎新消數年之禍亂

建萬世之太平。天下臣民不勝慶幸。近聞京師有言大
用等貪緣欲求復用。及聞從龍內臣漸以驕奢納賄。
招權仍蹈覆轍。如是則寒灰復燃。恐燎原之可憂。涓流
不窒。恐滔天之必至矣。宜暴大用等罪惡。示不復用。以
破小人之奸。仍戒諸內臣保身惜福。用助惟新之化。
帝然之。因降旨曰。谷大用等蠱上奸權。張銳等朋姦債
事。朕新政之初。從寬發遣。豈容貪緣再亂天下。其小大
臣工。但與大用輩交通者。卽係姦黨。一切重繩。不貸已。
而給事中張原復上言。宜勅皇城及各宮閤寺。遇有
內使出入。嚴禁所自。勿令諸孽厮養雜入宮中。其各宮
閤侍。亦令勿通問遣。以滋弊。明卽令中宮新立。其供奉

闕寺。尤宜慎擇。當命張佐、鮑忠、遴謹厚者用之。蕭敬自涉奸黨。不可委託。從之。仍敕司禮監嚴行禁諭。原又言。蕭敬曩通宸濠。巡按程啟充籍出私書。而姦黨妄書。指據尤明。兩京臺諫官數敬罪者。亡慮數十疏。陛下猶置左右。委以機務。不知何取于敬也。太監劉恭及廝養王諒皆納賄招權。爲敬腹心。並宜殛竄。以祛積蠹。不報。時給事中張翀亦言。各處鎮守內臣起于景皇帝初年。原非祖制。不惟冗員無名。適爲奸宄之資。臣之所未鮮也。今雖革而革心然。縛窮奇之腹。而欲其不食。箝竊脂之喙。而欲其不肉。亦難矣。乞盡查革以復祖宗之舊。不報。

十有一月庚申。皇太后邵氏崩。

帝祖母也。初爲憲宗貴妃。生興獻帝。帝卽位。尊爲壽安皇太后。至是崩。大學士楊廷和定議哭臨一日。喪服十三日而除。丙寅。禮官請素服御西角門。帝曰。朕哀慕方切。豈忍遽從所請。

附錄南京都察院副都御史王懋中上言。龍江瓦屑壩。權取竹木薪炭。自有制置辦。蔬菓非制也。宜將兩關內。臣人人減損其半。仍敕守備官簡廉勤者用之。歲終更替。帝謂權分竹木薪炭。亦滋侵漁。乃敕管權主事監權御史。計其一歲所用量。并檄納稅貯帑支給。勿令內臣權分。復留弊萌。

收李隆詣京卽訊。

先是陳九疇至甘肅微知李隆嗾使鎮卒殺燬許銘狀。楊淮簿對有據。因上言宜急斬隆。傳首九邊以彰國典。事下。兵部復趣巡按御史劉翀勘奏。如九疇言。兵部覆請收隆。乃械隆詣京。下法司卽訊。

十有二月甲戌上 壽安皇太后諡。

帝敕禮部曰。朕祖母 壽安皇太后夙事 皇祖誕生。興獻帝肆致眇躬。入承大統。方隆尊號。期享遐齡。孝養永終。奄忽遽棄。追惟懿德。宜有徽稱。乃上尊諡曰孝惠康肅溫仁懿順協天佑聖皇太后。

逮繫僉事史道于詔獄。

初道爲兵科給事中。王瓊之戍也。道疏援之。彭澤及楊廷和俱銜道久之。出道爲山西按察司僉事。道怨廷和。乃上疏劾廷和貪定策功。要封拜。而壽安皇太后崩。擅議哭臨。一日喪服十三日而除。無所忌憚。武廟自稱大將軍。廷和爲草敕。不聞匡救。乃爭興獻帝一皇字。且交通錢寧。主復宸濠護衛。助成逆謀。及武廟南征。凱旋乃爲錦文。迓賀。無人臣禮。其子修撰慎中含。恒前後旋里。携橐中裝甚盛。貪聲已著。從子進士恂。以吾家卓犖。目之輿論。可知。宜加罷斥。以快人心。廷和亦上疏自理。因訐道申救。王瓊。陸完。許泰等爲通賄市權。俱下吏部叅看。尚書詹宇覆奏。宜置于理。旣而彭澤上言。

道等懷私市恩宜械繫收訊從之有旨命錦衣衛收道下鎮撫司鞫問給事中于桂御史曹嘉各論救不報久之付道刑部論贖出爲滁州判官

禁言官獨劾大臣

初給事中章僑上言兵部奏擬平濠功次中多冒濫彭澤銜之已而給事中徐景嵩陳江疏論工部侍郎趙璜不報各引疾去璜乃進拜尚書僑復論之彭澤遂目僑等爲和佞欲以報僑及史道與楊廷和相訐也澤遂上言宜懲姦黨以重國體謂廷和輔養聖德贊理萬幾忘身家之禍福辭定業之封拜且與尚書喬宇等同心協德仰承恩命日夜憂勞期答聖眷而姦佞小人假

言責而橫行使密勿大臣避嫌疑而求退不可也。乞勅臺諫官糾劾大臣必其姦貪不職負國殃民者尤必會章交彈不許懷私復怨及風聞妄詆以傷國體至于揀臺諫官必諮訪老成諳治體者尤必聽堂官及攝事者叅奏約束之。帝以爲然遂禁言官獨劾大臣。

附錄是歲左諭德溫仁和侍講穆孔暉主考順天鄉試仁和頗有訾議南道御史王林劾其私通關節苞苴不報。

章懋卒

懋仕終南京禮部尚書致仕是歲卒于家贈太子少保諡文懿學者稱爲楓山先生。

癸未嘉靖二年春正月。

應天鳳陽山東河南陝西地震。

南畿青齊雍豫諸州同時地震。給事中黃臣上言。太監蕭敬久竊重秉。復開傳乞之門。地震之變。斯人致之。宜加竄斥。不報。

除言官獨劾大臣禁。

初彭澤奏禁言官私劾四品以上官。御史汪珊上言。言路開則人情通而世治。塞則人情鬱而國危。王氏重言者之罪。而新莽勢成。李林甫不欲人言。而祿山禍起。臣等將謂澤導陛下以三代之盛。不意導以拒諫之計也。夫史道論奏廷和。就使其言狂妄。此特一臣之失耳。

懲羨者不必吹鑿，畏噎者不可廢食。澤欲以此壅塞言路，阻壞祖宗之法，可乎？因條析澤言不可知者有四：奏之不報，于是廷和連疏乞罷。帝降溫旨，留之。御史曹嘉復上言曰：我太祖創法制治，度越百王，酌古建官，分列六卿，故敢言復設丞相者誅，大小稱位，內外絕跡，故敢有上言大臣德政者誅。政在朝廷，權在主上，故敢有交結朋黨，變亂成法者誅。此我太祖防微杜漸之深慮也。皇上嗣守洪基，固當遠繩祖武，以成大順之道也。然勵精之心雖切，而輔導之事罔聞，甚則招權納賄，樹黨行私，其勢不得不迫且擅，而附之者不得不衆且篤。其受攝御者，不得不重足而後立，累息而

後言矣。餘不暇論。今觀史道劾奏廷和。嚴旨切責。下之禁獄。廷和具疏自理。彭澤符奏同覆。俱蒙溫旨慰留褒獎。至律身處家之際。無不備悉。是爲大臣者真能擅威福以移主柄。黨大臣者真能取容悅以惑聖聽矣。且澤旣謂廷和古社稷臣。不過史道朋黨奸惡。納賄玩法。又謂廷和之可去。可留。史道之有罪無罪。簡在帝心。非敢干與反覆變詐。巧佞多端。幸矣哉。太祖之不相值也。如其值。則上言德政。交結朋黨。符同奏劾。諸大罪。能逃鈇鉞之誅乎。宜速允廷和罷歸。以曲全其身。仍將史道薄示懲創。以少舒其憤。庶幾九卿六部近慕劉健之風。臺諫遠追薛瑄鍾同之義。而我太祖不設

丞相 太宗官卑易治之良法美意始復矣亦不報給事中李學會復上言 太祖設六科給事中關聯六部諸司舉正欺弊以警百官列十三道御史彈壓百僚事得專達此 聖祖防姦保治之初意所以崇耳目廣聰明非細故也澤何所見而欲紊亂紛更以重大臣之威以奪 天子之柄此其罪之大者必如澤言事須會章交彈萬一有邪儉之黨蠱惑衆聽暗主其中是臺諫終無彈劾之舉矣且上言大臣德政律有明禁而澤肆無忌憚面欺人主欲以箠制臺諫之口不知何以事陛下也澤言倫揀臺諫官宜得老成則臣等當奪官不言可知乞盡罷免以舒澤之忠憤以釋臣等之夙慙 帝

覽之乃命臺諫官照舊彈劾毋自疑阻。

二月丙申葬孝惠皇太后。

初遣禮官相兆域廷和上言茂陵左右不可恐有震驚之虞賈詠曰當祔雖有之難免不當祔雖無之難爲至是祔葬茂陵。

毛澄罷。

附錄初御馬監額設草場若干頃正德間谷大用竊柄誑惑武宗遣太監李璽踏勘遂侵奪民業至萬餘頃每歲約剥民租百有餘萬皆歸大用等家朝廷不知之也至是清覈勲戚田土凡草場諸地因併覈之畛畔旣明侵冒莫掩言官奏收璽等置之于理帝難之是

日進講文華殿畢。帝召廷和近御座諭曰：草場乃祖宗舊制，踏勘亦先帝成命。地土錢穀，仍聽本監管理。李璽免訊，卿擬旨行之。廷和頓首承旨，退而上言。伏蒙聖諭，御馬監草場錢穀，仍聽本監管理。李璽免訊，俱已仰遵。聖意擬旨施行，惟谷大用竊弄威柄，蠱惑先帝，假勘地之名，混占民產，一萬餘頃，侵盜租賦，百有餘萬，利歸私室，怨及朝廷，情罪深重，神人共怒，必置諸理。然後國法可彰。爾況今水旱相仍，人民饑苦，追其所侵之半，足以備賑，與其積于一家，以利蠱國之盜，孰若散于萬民以溥朝廷之恩？不報。是時有大監張欽者，朝鮮人也，請廕其養子李賢，從之以賢爲錦。

衣衛世指揮同知。兵部尚書彭澤都給事中許復禮給事中安盤許相卿各上言不可。不報。先是太監趙山灰帝以從。龍恩廕其從子雲爲錦衣衛指揮。旣而太監楊聰丘清灰遂援乞亦廕其從子楊倫丘麒如雲官。至是南京守備司禮監太監戴義卒。御馬監太監梁恭等請廕其從子廝養戴錦等十有一人爲錦衣衛官校。帝以戴錦戴俊爲副千戶。餘不錄。給事中夏言力言不可。且曰。戴義歷事累朝。被膺簡任。衣蟒帶玉。亦已極矣。廼者病故。朝廷錫之諭祭。寶鏐爲造塋域。亦已厚矣。一旦官其一人。實爲過濫。此臣等不能已于言也。伏望特收成命。痛加裁抑。不報。

二月御史曹嘉謫補外。

初嘉上疏劾吏部尚書喬宇。其略曰。日者楊一清結張永賄錢寧以圖柄用。庸夫鄙之。宇感其汲引之私。公要彭澤。連疏推舉。周金乃錢寧狎客也。宇因納交而擢爲都御史。劉榮乃內閣書役也。宇爲朦朧奏廕其子。何喬宗以尚寶卿乞休。竟進三品。蹈先朝傳乞之弊風。至若宸濠犯順。安慶挫其鋒。新建邀而擒之。宇無亡鏃之勞也。而醜列三孤之命。將誰欺乎。疏上。不報。嘉乃倣宋臣范仲淹獻百官圖之意。差別京官四品以上。及春坊五品官。釐爲四等。上之。其一資望頗久。可備任用者。林俊。石瑄。孫交。汪俊。陶琰。劉玉。董玘。李時也。其二歛束寡過。

足供職守者。毛澄金獻民周倫何孟春李鉞鄒文盛臧鳳張璘姚維岩張雲張衍瑞劉麟張九叙溫仁和豐恩也。其三人品庸衆。尚堪策勵者。趙璜俞琳秦金賈詠吳一鵬李昆顏頤壽沈冬魁姚鏌鄭岳高璣陳雷崔傑魏境也。其四行檢卑污。速宜黜削者。張子麟童瑞陳雍周金張縉張璚柴儀安金汪峰楊一清楊一漢劉榮趙永顧鼎臣也。此四等者。進退倚伏之間。治亂安危所由繫也。亦不報已。而給事中毛玉上言。曹嘉不當品第大臣。宜賜罷斥。帝從之。命對品補外。先是給事中閻閣亦以指斥當路。出爲按察司僉事。有謂嘉之疏閱所草也。而史道謫後。稍自滁州判官移南陽通判。御史向信上

言曰史道倡爲異說以惑人心。曹嘉衍爲評品以犯公議。皆僉事閭閻鼓之也。有臣如此。不宜與之同朝者。宜加罷斥。以快人心。御史劉廷簋亦上言。閭道與嘉三人者。結爲黨友。立異邀名。放言排詆。危間忠良。欲以誤天下。壞國家。古所未有。乞將三臣重則論法。輕則斥放。不與同中國。庶天下稱快。爾從之。命各奪級爲邊地雜職。乃以史道爲金縣縣丞。曹嘉爲茂州判官。閭閻爲蒙自縣縣丞。焉。御史盧煥馬錄給事中。孟奇趙邦端各論救。不報。御史胡效才上言。朝廷近日所以處言官及被劾者。不無偏比。被劾者一槩慰留。而嘉等則責之無已。降用之。旨方下。而蒙自等處之謫復上矣。臣聞茂

州金縣俱爲荒徼。而蒙自甚非人所居。人言皆曰閼等
到彼。不歿于瘴毒。必有觀望小人承順。願指而致之。歿
地者。夫一時而逐三言官。已非令典。果如人言。是因大
臣而殺言官。尤不可以爲後訓也。乞將閼等依前處置。
而斥其所論一二人。如太常卿楊一洪祭酒趙永可也。
不報。

策士奉天殿。

共四百有十人。得徐階。

夏四月。興廟初用八佾。

先是太常卿汪舉上言。安陸廟宜用十二籩豆。如太
廟儀。從之。禮部請置奉祀官。又言樂舞未敢輕議。帝

命廷和集議之。至是禮部侍郎賈詠等會公侯九卿等官上言。正統本生。義宜有間。八佾旣用于太廟。安陸樂舞似當少殺。以避二統之嫌。帝曰。仍用八佾。于是何孟春及給事中張紳黃臣劉最御史唐僑儀秦武等南京給事中鄭慶雲等各上言力爭。不報。

逮繫主事羅洪戴于詔獄。

有錦衣衛百戶張瑾者。凌轢典廩。勒索斛羨。監倉主事羅洪戴欲劾之。瑾懼。詭請受笞免劾。洪戴倉卒從其所請。瑾得笞。遂奏洪戴擅撻錦衣官屬。帝怒。命逮赴鎮撫司考訊。給事中劉濟等尚書林俊孫交等力救。不報。時帝又爲都督同知陳萬言起第京邸。言官余贊等

尚書趙璜等抗疏請止不省。而暖殿太監崔文者以禱祀誘帝。乾清宮諸處各建醮。連日夜不絕。又命內監十餘人習經教于宮中。賞賚不貲。寵幸日盛。給事中張嵩大學士楊廷和力阻不報。給事中周瑯上言。陛下臨御以來。宵旰忘疲。形神兩瘁。有前代帝王圖治之勤。望治之切。固宜任直諫。老成以資其謀。謨。而比來章疏漫不加省。豈太平有道之象哉。頃者爲都督萬言營第。贊璜等言之不省。豈以諸臣沽直以自賢耶。陛下下羅洪戴于詔獄。俊交等言之不省。豈以諸臣朋黨以相庇助。陛下于宮闈禱祀。廷和等言之不從。豈以諸臣皆緣飾經義不能助。陛下求福利耶。然此特聽納

之失耳。廷和以卿輔之職。師保之重。而宮闈禱祀。使不得與聞于始。又不得幹旋于終。是委任之失。又如此。伏望陛下留神聽納。以達下情。留神委任。以崇政本。則耳目不至于壅蔽。政柄不致于下移。而熙洽之盛。不復難矣。疏入。復不報。已而給事中張汝安盤等交章劾文。乞置重典。俱不報。

閏四月。移刑部罪人李陽鳳于詔獄。

李陽鳳者。太監崔文家廝養也。怙文寵。謀筦城卒。勒索工值。有身在工所。而巷伍又征役錢者。怨聲載道。御史劉黼發其事。工部尚書趙璜。移文刑部。執陽鳳等鞠之。文囑尚書林俊。置不問。俊不從。文遂誣。帝請移陽鳳。

鎮撫司考訊從之。命下刑部林俊執不肯與文又譖俊違抗。詔旨。帝怒切責俊。詰其狀。俊惶恐謝過。初羅洪戴之被逮也。俊與戶部尚書孫交申救。不報。各求罷歸。帝慰留之。至是被詰。修撰唐皋上言曰。先王優禮老成。以其謀國多識。舊章不可不重惜也。邇者孫交林俊引疾乞骸。陛下溫旨慰留。此固惜老成重典刑之盛心。不意因崔文廝養之故。乃詰責俊。令其言狀。則與陛下起廢之初。慰留之旨。大不侔矣。萬一俊掛冠玄武。祖帳東都。陛下何以自解于天下哉。疏入。不報。刑部主事楊永亦上言。舜爲天子。不得撓皋陶之法。今刑部按問一廝養。而竟奪之。夫俊陛下之士師也。以

其官任之。而不容守其法。何用是官爲哉。鎮撫司受制
內臣。承望風指。又豈敢直陽鳳之罪。以昭國法乎。使
陛下之法。不信于天下。取譏于後世。皆崔文爲之也。乞
敕司禮監按問。并其黨周用田。顯蔡秀等。明付法司。以
正其罪。斯義舉矣。給事中趙漢亦上言。李陽鳳之事。不
甚大。而崔文快心之大者。在能矯詔獄。以鉗人在能
致尚書之詰責。在能加言官以奏擾。恐克其勢。不亂不
已也。近聞事初發時。文收捕告人。捶楚幾死。叱之去。曰。
此笞寄與趙尚書。其威侮大臣若此。則劉瑾之爲。不患
文不能爲矣。是以再干敕旨。詰責林俊。俊何人也。而
文謨陛下罪一者舊耶。俱不報。

停齋祀

初太監崔文以禱祀誘帝。大學士廷和力諫。不聽。臺諫言之。俱不報。給事中鄭一鵬上言。臣巡光祿。見正德十六年五月以來。官中自常膳外。少有所取。邇者禱祀繁興。制用漸廣。乾清坤寧諸宮。各建齋醮。西天西番漢經諸廠。亦各有之。至於五花宮。乾清宮。西暖閣。坤寧宮。東次閣。亦有之。或連日夜。或間日一舉。或一日再舉。經筵俱虛設而無所用矣。傷太平之業。失天下之望。莫此爲甚。臣謂挾此術者。必皆魏彬張銳之餘黨。曩以欺先帝。使生民塗炭。海內虛耗。先帝已誤。陛下豈容再誤。陛下亟誅之。遠之可也。臣放金錢。一醮蔬腐之

費至萬有八千其餘不知幾十萬也以月計之不知幾百萬也。今天災時變月無虛日京師之民至有裹席行乞母子裸而餓死者。州縣則徵發繁擾仍以饑饉窮者轉爲盜賊良者糜于兵刃邊境之民日夜望風荷戈而不得食。陛下以爲今之民怨耶樂耶忍歛民怨不忍傷佞倖之心忍拂元臣弼士之諫不忍違寺僧之請此愚臣之所未鮮也。伏願改西天厰爲寶訓厰以貯祖宗御製諸書西番厰爲古訓厰以貯五經子史諸書漢經厰爲聽納厰以貯諸臣奏疏選內臣謹畏者司其筦鑰陛下經筵之暇遊息其中則壽何以不若堯舜治何以不若唐虞哉。帝曰天時饑饉齋祀暫且停止。

五月大旱。

自去冬不雪。入春風霾連日。迨夏益甚。四方災變奏報尤頻。帝憂之。敕大小羣臣同心匡輔。毋事虛文。時京師復有雷震城竿之異。御史秦武上言。陛下踐祚之初。盡釐先朝變亂之章。復祖宗畫一之法矣。近日以來。漸肆更張。或以養子而嗣。闕監之封。或以內臣而奪司寇之職。吏部之銓除。阻撓既多。法司之律令更易殆盡。敕自中出。而政府不得贊其辭。法以私行。而六曹不得據其志。待臣之禮久衰。納諫之心愈怠。經筵則屢日告罷。祠禱則不時修舉。修身齊家之德罔聞。狎刑暱寵之行已著。上違祖訓。下拂人情多矣。此天之所

以屢示災變也。帝怒其狂率，切責之。南京給事中彭汝實亦上言：「應天以實不以文，感人以誠不以迹。三王以還，莫之能違也。邇者黃風黑霧，春旱冬雷，天變于上者屢矣；地震泉竭，揚沙雨土，地變于下者屢矣。羣小漸張盜賊，公行草妖木異，非時失節，人物之變亦屢矣。昔人有言：『怒予之天，猶可爲也；忘予之天，不可爲也。』皇上省災之誠，或足以仰答天心矣；而行政之可適，用人之可間，有不能無燕閒虛費于女寵，腹心委託于貂璫。二廖諸張，乃得緩死；李隆蘇繒，猶得無急；鎮撫以報復而窘辱主事羅洪戴，內豎攜私鹽而執解巡檢程景貴。崔文狐媚，蓋羣枉之赤幟；蔣輪狼貪，爲戚里之谿壑。凡

若此者皆不銳意修革而望天意之回人心之感亦已難矣亦不報初太監李曇者往來淮揚間舟攜私鹽鬻賣巡檢程景貴率邏卒搜得之曇怒誣訴于東廠太監芮景賢奏差官校逮繫景貴赴京而蔣輪者興國太后之弟也欲以其子榮奉安陸廟祀故汝實奏及之日本貢使大掠寧紹諸處

初鄞人宋素卿者奔日本正德六年與其國人源永壽來貢其從父澄識之告素卿附夷狀守臣以聞置不問至是其主源義植幼闇不能制命左京兆大夫大內藝興遣僧宗設來貢右京兆大夫細川高亦遣僧瑞佐及素卿來貢各強其主給以中國符驗先後至寧波故事

市舶司閱貨及宴坐並以所至先後爲次時瑞佐後至而素卿狡賄市舶太監先閱佐貨及宴又坐佐于設上設不平遂與佐相讎殺太監又以素卿故陰助佐援之兵杖而設衆頗強拒殺不已遂燬嘉賓堂劫東庫逐瑞佐及餘姚江佐奔紹興宗設追至城下逼令鄉佐獻出不許乃去沿途殺掠慘甚六日設逃至西霍山洋殺備倭都指揮劉錦千戶張鏜縛去指揮袁璉百戶劉恩又自育王嶺逃至小山浦殺百戶胡源浙中大震巡按御史歐珠鎮守太監梁瑤奏聞

遣法司錦衣官之甘州按覈李隆罪狀

初其州變聞都給事中許復禮劉濟給事中魯論御史

喻茂堅田麟等交章劾隆及陳九疇劉紳奉命勘鞫
盡得其情獄且上請下法司詳勘當斬隆首奏上帝
命復集多官于闕前鞫之先是隆誣奏許銘激變鎮兵
而鎮守太監董文忠者亦傍隆議奏聞帝不能無疑
也故有是命已而命鞫情律相應覆奏上帝猶未信
命遣三法司錦衣衛堂官各一員往甘州體勘都給事
中劉濟上言李隆情罪具于楊淮等之爰書法司多官
覆覈相同是宜速正典刑而遣官覆勘徒滋遷延耳
帝曰朝廷遣官勘問正欲慎重刑獄公聽斷以正國法
也豈有遷延偏徇之意爾等何故如此奏擾給事中陳
時明復上言王制成獄辭史以獄成告于正正聽之正

以獄成告于大司寇。大司寇聽于棘木之下。大司寇以獄成告于王。王三宥然後制刑。言有司疑獄讞諸王朝。未聞王朝之獄下之有司也。今李隆罪狀已明無可疑者。乃復遠勤有司。則過矣。況陛下所託以爲股肱耳目者。內則世勲公卿臺諫諸臣。外則撫按官耳。今撫按勘明而不信。關前鞠明而不信。則撫按舉朝之臣皆不勝任矣。且今日所遣無寧他求優異者。以膺任使耶。抑以其職務稍簡。若佐二者以行耶。向者萃數十百人參訂之而不足信。今以二三人探求巨猾秘情于數千里之外。又安知其能當聖意耶。此所謂不必遣而復遣者也。因條言其五不可上之。亦不報。已而大理卿鄭岳

等往勘情真。帝疑稍解。久之始誅隆。

六月有星孛于天市。

給事中周瑯上言。陛下紀元以來。孽火晦靈。烈風暴雨。地震江溢。不可殫述。乃者又有星孛中天。光芒特異。以及震雷之變。災亦甚矣。夫災祥者。禍福之應也。得失者。災祥之感也。陛下亦思所以自省乎。臣請以時政之大者言之。曹嘉以彈擊過當。陛下置而不問。可也。乃奪一階以寬之。而連及旁助之闕閤。獨不爲求言計乎。李隆以私憤謀殺撫臣。陛下卽軍中斬之。可也。乃淹時報勘。若將爲之地者。獨不爲公者慮乎。崔文縱廝殺剝民。陛下付之廷議。以嚴首惡之誅。可也。乃追易。

成命歸之鎮撫司。獨不爲履霜戒乎。陛下入繼大統。公議則當專意于正統。以私恩則當置後于安陸。此不易之定論也。乃日討尊宗之典。而欲冒擬于名號。至使禋祀無主。不擇親賢以爲之後。則公議已失。而私恩亦未得矣。人事旣失于下。天變自動于上。未有有其事而無其象。有其象而無其應者。可不慎乎。伏望慎選宗屬。以嗣安陸。復嘉閔以啟言路。亟黜崔文誅李隆。以明典刑。則一德格天。而災異不足弭矣。不報。

救止楚王代奏陳乞。

先是崇陽等府諸宗室二十餘人。歲祿不克。請借藩司帑金預用。楚王爲代奏從之。有承奉潘朝者在京買

領關符還楚。需索各宗謝金百餘萬。方爲投符。而齎符百戶童剛亦索謝金二百餘兩。各宗不能具金。朝嗾羣少輟轢之。且曰。代奏非王本心。朝慙。慙爲之耳。柰之何。得請不德朝也。各宗不任其恩。悉鬻食具合金與之。巡按御史何鰲聞之。奏于朝。請置朝于理。戒諭諸王。從儉守訓。勿得陳乞。下戶部覈奏從之。因勅楚王。凡例外之請。勿得代奏。

附錄王邦奇者京中之無藉子也。初寅緣劉瑾張銳錢寧等。署爲錦衣旗校。假以緝刺姦宄。椎剝齊民。無筭閭巷苦之。嘉靖初。奉詔視職。邦奇屢奏刺姦有功。不宜同衆罷斥。乞恩復職。章下兵部看詳。給事許復禮安

磐等交章言其不可。不報。給事中章僑復上疏力爭之。亦不報。已而兵部尚書彭澤覆奏當復職。從之。仍以邦奇爲錦衣衛百戶。

太常寺少卿張衍瑞卒。

吏部上言衍瑞諫止武宗巡幸。忠義與黃輦同科。宜贈官以示優崇。從之。贈衍瑞爲太僕卿。

丁巳。敕加興獻帝后皇號。

初五月間。遣司禮官諭廷和等加稱。興獻帝后皇號。廷和力言不可。至是。帝御平臺。召廷和。冕紀宏入見。授以手敕。諭加興獻帝爲興獻皇帝。興國太后爲皇太后。廷和等退而上言曰。臣等親承天語。諄復無

少遽色。曷勝欽仰。第奉迎。陛下之初。凡正統本生講
論已定。聖心固以洞察矣。豈復得不顧義理。徇情行
之哉。

論曰。新都斯言。史臣謂其以定策自居。無所忌憚過矣。
第其所謂正統本生講論已定者。則亦弗思之甚爾。夫
武廟上賓之日。受遺命者。廷和二三人也。遺詔之文。豈
武廟所自草乎。其假手公等無疑矣。使當時長慮却顧。
詳議其正統本生之辨。則遺詔必曰。取興獻王長子
嗣皇考。孝宗以承大統矣。如是則安陸開讀之際。爲
世宗者。能不駭愕顧戀。入白聖母。而權正統天親之
輕重耶。權之則分義審。分義審則志慮一。由是稱謂追

崇之典皆將惟其所議而莫之違矣。乃慮不及此而遺詔之中言統不言嗣。故開讀之日。帝不知其以我爲人後也。怡然往就大位。已而聖母亦不知其絕我母子也。怡然視其子往就大位而已。是以帝至中途見禮部儀狀則慄然曰。遺詔以吾嗣皇帝位。非爲皇子此狀云何。聖母至通州聞朝儀欲考孝宗亦曰。安得以我子爲人之子。是母子之間皆駭異爲後之說。而大拂其初心矣。此永嘉之議所以投機而易售也。新都不是之思而更堅持爲後之議。是以人臣強其君爲人後也。于是帝登大寶稱于一人矣。上無君長之詔。旁無父母之命。而爲臣者乃欲強加以人後之名。奪其母子

之愛而隔絕之無惑乎愈執而愈不從也然則所謂講論以定者不知果何所講耶。

秋七月製興廟樂章。

迎神曰太和。初獻曰壽和。亞獻曰豫和。終獻曰寧和。徹饌曰雍和。還官曰安和。設典樂官司之。

逮繫臨洮府知府郭九臯詣京。

初九臯爲永平知府也。定國公光祚奏言。土豪久隱功田。下巡撫順天副都御史孟春巡按御史郭同臣監察御史樊繼祖戶部主事張希尹勘覈。春等檄九臯及同知張守會勘。已而按得前田。初係姦民趙紀違例投獻。駕言馬甫廣等吞噬。遂論紀子文編戍紀怙惡不逞。屢

疏摭拾九臯奏辯通政司庀之紀遂誣九臯及同知張
守多受甫廣金錢勘歿平民列狀投東廠告之而太監
芮景賢者喜爲羅織者也遂請奏逮治從之于是九臯
移守臨洮矣乃遣官校之臨洮及永平收繫九臯與張
守等詣京對簿故事厥衛官無受民訟者而特旨收
縛罪人亦不出京師諸城門刑部尚書林俊上言人
主爲主宜攬大綱卽九臯貪忍不妄陛下猶不免以
天子之尊下侵有司之事頗類苛察足傷大體設使趙
紀之詞虛謬九臯被逮而歿則虧損聖德孰任其咎
今據其單辭眞僞未辨而九臯已褫奪衣冠身就縲紲
甚非德美乞降明旨徵九臯至永平聽理而遣刑部鑰

衣衛官往會撫按會鞠明實。如果紀言不謬。然後械致九臯來京。處以極典。未晚也。疏人不報。都給事中劉濟等抗章劾景賢亂政。宜加罷斥。景賢上疏自理。帝優旨慰之。于是給事中章僑復以爲言。帝怒。奪俸三月。汪思及南京科道鄭慶雲。王命爵吳瀚等交章言景賢奏逮知府。此迎瑾亂政之故習。豈宜復見于今日。乞敕廠衛官勿生事釁。俱不報。

林俊致仕

初俊以李陽鳳之事被詰也。遂有去志。屢疏乞休。不報。至是又言郭九臯不宜逮繫。帝復不聽。乃稱疾篤。乞骸骨不已。從之。賜酒食寶鏹以行。給事中衛道。上言林

俊之去是崔文排之也不宜以廝養之故而去大臣乞降諭旨留俊不報。

逮繫郎中葉寬等于詔獄。

帝賜都督陳萬言以在京地方營修新宅工部尚書趙璜執奏不可萬言銜之訴璜于帝謂爲營繕郎中葉寬等主之也帝怒命逮繫寬等下鎮撫司考訊璜聞命惶懼不知所爲因而乞恩服罪乃已于是科道官劉黼等交章申奏不報御史陳相上言人君之心惟在所養能于善端發見之時擴而克之無所施而不當矣茲者賜萬言以房屋陛下不忍之心也而尚書趙璜因而服罪郎中葉寬以之係獄爲不用恩焉爾革陶

淳管事。陛下本心之明也。而芮景賢之慰留郭九臯之逮繫。爲不用明焉爾。崔文左道亂政。陛下不忍罪也。而反忍于奪法司之權。使耆舊如林俊者。一旦致仕。李曇鬻販私鹽。陛下之不察也。而反惑于挾仇之訴。使盡職如程景貴者。久淹禁獄。故林俊去而九卿之心灰矣。葉寬罪而百司之體鮮矣。郭九臯被逮而牧地方者寒心。程景貴受誣而盤詰關隘者喪膽。天下臣民其不率而爲苟且之習者幾希矣。及今不圖。未流安救。伏望皇上推不忍之心。擴本明之德。留俊釋寬等則聰明不蔽。而雍熙之化可臻矣。帝切責之。

給事中劉最謫補外。

初太監崔文以禱祀誘帝靡費帑金無筭而芮景賢所任千戶陶淳者又聚羣校羅織諸縉紳至于巨姦大蠹反以賄脫免有遺孽錢寧者遣其所養朱喜携萬金來京匿其黨陳勲家欲賄諸宦戚圖復故官淳緝得之與官校分匿其金脫放之又威脅奏寬人鄒興自縊劉最上言陛下聰明天授首竄元惡簡任淳良天下稱頌奈何一日壞之于么麼子也臣按崔文以卑微驟居近侍首導陛下于有過之地法官深嚴恣爲禱祀侵費帑金六七萬兩累朝積貯視爲已藏而攘取之陰耗國本其罪彌彰且奪法司之囚折正官之氣使天下皆謂陛下庇邪豎拂大臣以累清明之德文實啟之

不誅文不知 陛下何辭謝天下也。又東廠太監芮景賢任用匪人千戶陶淳性行險惡閭閻曹嘉素不與通則因事以文致其罪緝獲錢寧廝卷匿金而擅自脫釋威脅鄒興懷冤自死卽此二事狡惡欺罔之罪有不容誅者而景賢不悟任其愚弄景賢之罪難追矣乞查覈崔文侵盜帑金誅之以爲首惡之戒景賢降 敕切責陶淳置對正刑席 陛下清明之德有光矣疏入不報旣而崔文撫拾自訴 帝優旨慰之曰爾端謹老成小心廉靜方切任用勿復爲辭劉宸旣言侵費帑金其令覈實以聞宸被 命知爲所窘也乃上言曰內帑不得查覈崔文不當構陷 帝怒曰劉宸奏事不以實輕率

妄言詰問不以服罪。本宜重懲。姑從寬外補。以稱朝廷容宥之恩。于是給事中衛道、汪思等各上章申留。以爲斥逐言官。殊乖治體。帝切責之。已而出。取爲廣德州判官。

八月。河南大水。

先是四方災異。奏報頻仍。帝曰。上天示戒。朕心憂惶。特降勅諭。同加修省。凡關吏治民隱興利除害者。切實舉行。以回天意。至是吏部侍郎汪俊上言。皇上入繼以來。昭德塞違。動無過舉。宜足致祥。而顧頻告災。青者蓋以臨馭未幾。政漸弗終。故天心仁愛。特示警懼。可不愴然愼終。以答天人之望。歟。請試言之。陛下登極一

詔百度惟貞。邇來舉措背馳。萬民失仰。詔令不能如初也。陛下卽位之初。罷逐庸回。任用耆舊。爾來師傅重臣。諮詢疎濶。任賢不能如初也。陛下卽位之初。聽言如流。邇來事涉戚宦。九卿臺諫。執奏不從。聽納不能如初也。陛下卽位之初。釐革倖位。邇來戚宦之家。藩邸之臣。侯伯錦衣。陳乞日多。慎名器不能如初也。陛下卽位之初。姦黨巨惡。下三法司鞫評。邇來事非機密。悉付詔獄。臺諫論列而不從。法司執奏而被詰。法守不能如初也。陛下卽位之初。命科道查覈御馬監馬匹牛羊照數會計。繼因閭閻瀆奏。遂寢前旨。卹民不能如初也。陛下卽位之初。禁出左道。邇來修設禱祀。濶瀆

官庭禁邪不能如初也。陛下卽位之初神氣精明邇來聖躬違和天顏異舊豈鼎盛之年忘在色之戒歟此保固不能如初也有一于此足以干和况兼之乎未可諉爲適然之故而不加之意也疏入不報。

進封壽寧侯鶴齡爲昌國公封都督同知陳萬言爲太和伯。

帝復以定策功進鶴齡爲公加慶陽伯夏臣爲太子太保又以恩澤封萬言爲伯其子紹祖爲尚寶司丞又以玉田伯輪之從子太清景俱爲錦衣衛千戶吳振武受俱百戶初萬言元城諸生也以 后父授鴻臚卿尋遷都督同知至是封伯給事中張原御史王璜各上言鶴

齡不宜封公。萬言封伯不宜太早。子紹祖不宜寄祿。尚寶司夏臣不宜加官。保蔣輪一門有二指揮三千戶。已爲僭賞。吳振武受不宜以戚里。瓜葛冒官錦衣。乞收成命。不報。時楊廷和以十二歲考績亦加太傅。廷和不拜。

禁勲戚及閹宦家婚姻。

初正德間太監李宣提督京儲。嘉靖初革之。宣令其弟侄與戚畹連婚。夤緣中旨。復以宣提督京儲。給事中孟奇上言。宣在先朝出入逆瑾門下。遣往江西勘事。得賂巨萬。還饋送瑾珠寶八斗。駭人心目。宣府馬氏女得幸先朝。宣獻私第數區。謀督京儲。陛下卽位。幸汰黜之。

人心大悅而乃諂賂戚畹要結婚姻夤緣左右復有提督之命上累新政罪不容誅矣然其所爲豈無倣尤盖先朝姦黨有魏彬者其弟魏英生三女一婚江彬之子二配長寧襄城二伯張銳者其兄張明一女以適豐潤伯之子至若錢寧之女配王駙馬之孫男廖鵬之弟以泰寧伯爲子壻彼數大家者或其先連婚帝室或其先銘勲太常乃納采于莞庫之人同穴于輿臺之鬼惟利是求曾無覲顏篋先辱親于是爲甚皇上中興以來除舊布新而姦黨弟侄厮養猶潛居都城布列禁地覬覦窺伺無所不至若謀遂成爲禍不細乞將李宣取還閒住一切姦黨厮養盡行驅逐其勲戚之家敢有仍

故連婚者卽係姦黨許臺諫官糾舉緝捕庶使已污之族知所愧懼而方構之黨革心于將來矣帝曰李宣姑用督儲其姦黨第任廝養先年蠱惑亂政未正厥辜其家老發南京諸監局供役第任廝養勿得擅入禁中其勲戚之家勿得射利與諸黨連婚違犯者重罪不貸

附錄南京工部侍郎吳廷舉上言先年罪人以金贖刑貯工部以備修營弘治末南京戶部奏改納米補各官卒祿廩及囹圄囚食今覈戶部錢穀約足支給宜

米貯常平倉備賑下刑部覆議從之

光祿少卿華湘者攝欽天監事上言堯時冬至初昏昴中日在虛七度今冬至初昏室中日在箕六度去堯未

四千年而差五十度矣。自至元辛巳改曆至今。歲差一分五十秒。今差三度六十四分五十秒也。故洪武中。博士元統言我朝曆法。雖名大統。實仍授時之舊。年遠數盈。漸差天度。合行修改。夫至元距洪武甲子。僅一百四年。迄今則二百四十三年矣。年愈遠。數愈盈。可不修。改以合天度哉。乞敕禮部延訪知曆如楊雄、邵雍、郭守敬者。詳定歲差。以成一代之制。不報。

論曰。我朝請改曆元者。元統鄭善夫及湘凡三人矣。大都皆剿舊說。而未窺授時曆法之深也。蓋授時曆。雖元起于至元辛巳。而不以辛巳爲曆元。其法以七千二百五十七萬六千爲一元。一元之中。平分天地人三元。

各得二千四百一十九萬二千。自太一甲子至嘉靖四十三年甲子。歷過五千二百九十五萬八百四十。已逾天地二元矣。今當人元內四百五十六萬六千八百四十。後推將來。每年增一。前考已往。每年減一。是以太一甲子爲曆元。而不以至元辛巳爲曆元也。所謂以辛巳爲元者。蓋曆家以世數遼遠。難于推算。故截去真元而姑以辛巳爲始耳。遂使睿識之士。無所考據。紛紛異辭。不知曆元之所在矣。至于歲差之法。起于子半虛六度。約六十六年而退一歲。自堯時迄洪武甲子。退過四十九度五十七分。故冬至日。纏箕七度七十九分。正統甲子。退過五十度四十一分。冬至日。纏箕六度九十六分。

弘治甲子退過五十一度二十四分冬至日纏箕六度一十三分嘉靖甲子退過五十二度七分冬至日纏箕五度三十分以後每歲約退一分三十八秒四十七微步曆者隨年減去之矣豈仍至元辛巳之舊哉今考至元辛巳冬至日纏箕九度二十二分一十八秒至嘉靖初年日纏箕五度八十五分蓋已退過三度六十餘分矣又將何所于改耶自嘉靖初至今上壬午六十二年又退九十三分故今曆冬至日纏箕四度九十二分其與至元辛巳日纏箕九度三十七分者相去遠矣而謂仍用至元之舊也果何見哉至于日食起復方位多寡分數稍有不同則以南北地勢不一里差之法未之

講爾故正德甲戌日食。日官推步八分六十七秒而閩
廣之間遂至食既萬曆乙亥日食京師未甚而蘇松至
晝晦則南北之地勢使然也。蓋日輪大而月魄小故相
掩之際自下視之南北不同每千里而差一分東西不
同每千里而異數刻矣。而豈曆元不精歲差未改使然
哉。若以爲歲差未改所致則自至元迄今已差四度五
十九分以法推之則合朔之時月已去日四度五十九
分矣。若之何而能食耶。按法月行一日十三度有奇則
一時當行一度有奇而四度五十九分當行四十餘刻
矣。如使歲差未改則今日之度與日官所步者當差四
十餘刻豈止起復方位多寡分數稍有不同而已哉。若

因此而疑曆元之當改則悞矣然則今之司天者亦嚴督疇人使之精深其業斯可耳勿信異議而輕爲更張也。

逮繫廣德州判官劉寂及御史王國用于詔獄。

初寂以劾崔文出爲廣德州判官也御史國用假以符檄使乘傳以去又有某官顏如環者同時出京如環以黃袱裹裝刺事者馳白東廠芮景賢卽奏請中旨遣官校逮繫寂如環及國用並下鎮撫司考訊。

九月南畿大饑

是歲北畿山東河南湖廣江西俱早有災而應天蘓松淮揚徽池等一十四郡及徐滁等州爲甚千里盡赤羣

殲載道姦盜因之蠭起南京給事中顧濤等御史吳瀚等俱以爲言欲責成守令招撫存恤下戶部議尚書孫交請留蘓松折兌銀兩浙鹽價蘓常粳白米濟墅關鈔課應天府缺官皂薪贖鍰等金兼賑從之又請發太倉銀二十萬兩浙漕米九十萬石往賑災民亦從之兵部尚書金獻民上言泗州洪澤聚有盜舟爲道路梗乞命巡撫胡定屬兵驅逐從之

冬十有一月奉 孝惠皇太后主于奉慈殿
遣官告安陸廟

劉宸編成

宸等繫獄已久所司以爰書上請 帝降旨曰劉宸編

戊顏如環削籍王國用謫遠方雜職給事中劉濬上言
罪至編戍爲民謫降遠方亦大矣使其情律不相應所
失固不爲小若與律合何不付法司明白擬議昭示天
下而乃爲此曖昧不明之舉哉傳示天下必謂冢等罪
不至此陛下特爲偏曲爾不然何緝執于羅織之門
鍛鍊于武夫之手裁決于內降之旨哉乞將冢等仍付
法司擬以應坐罪罰不報

主事桂萼上言大禮并獻席書方獻夫議草

初巡撫湖廣都御史席書草疏曰禮官之議舉朝是之
臣未敢以爲是璵韜之議舉朝非之臣未敢以爲非昔
舜繼堯統禹繼舜統未嘗不以瞽鯀爲父也皇上承

統武宗仍爲興獻帝子。別立廟祀。璫韜之議未爲迂矣。然舜禹雖父其父。未嘗尊其父以帝之稱。則禮官執奏亦未爲失。但禮本人情。皇上尊爲天子。而父母無尊稱。于情安乎。此與武王追王大王王季之心實未遠也。爲今日議宜定號。皇考興獻帝。立廟大內。祭以天子之禮。則大統正。而昭穆不紊。至愛篤而本支不淪矣。吏部員外郎方獻夫亦爲疏曰。陛下之繼二宗當繼統而不繼嗣。興獻之異羣廟當稱帝而不稱宗。請改孝宗曰皇伯。興獻帝曰皇考。別立廟祀。則合乎人情。當于名實矣。皆不果上。而桂萼者南京刑部主事也。日與張璫討論古禮。其議符合。至是乃上言。識

者皆謂孝宗有子不可復爲立後而舉朝之臣未聞有所規納者蓋自璵韜建議論者指爲干進故達禮之士不敢遽言其非爾臣按范純仁謂英宗親許爲仁宗子與入繼之主事體不同則宗臣之論亦自有辨皇上果許爲孝宗子乎其爲入繼之主明矣然則考興獻帝母興國太后質諸鬼神而無疑百世以俟聖人而不惑也臣久欲上請乃見席書方獻夫之疏以爲無俟臣之言者而迄今未奉宸斷豈皇上偶未詳覽耶抑二臣將上而中止耶臣欲再申其說併錄二疏以聞帝覽之曰此關係天理綱常仍會文武羣臣集議可否

附錄初莊奉夫人弟錦衣衛校尉邢福海奏援先朝魏振事例乞陞官職兵科參駁及兵部抗奏俱報聞已而司禮監太監鮑忠傳旨福海及肅奉夫人弟錦衣衛旗校顧錦俱授錦衣衛世千戶福海錦復奏乞蒞官理事下兵部看詳給事中夏言等上言陛下仁聖恭儉法祖立政湯文莫是過也詎意有此傳奉之舉以爲仁明之累國朝令典曰武職非軍功不授子孫世守率由罔愆邢福海顧錦平日不列行伍未有戰功一旦官以五品侍衛之職更令其子孫世襲甚不可也竊意邢顧二夫人昔在藩邸雖曰供奉多年積有勞勩然遭際龍飛克陳大內薦蒙封錫之榮寵渥逾涯所貴特持謙

降用保 君恩不當怙寵驕矜廣希恩澤伏望 陛下
仰遵成憲以名器爲重申飭內庭以汰侈爲戒特示裁
抑之公以防請謁之漸御史屠僑等亦上言不可不報
十二月內閣楊廷和致仕。

初御用監太監刁永請遣內臣之蘓杭織綺繒工部奏
言地方饑饉不必遣官 帝曰御服缺乏仍遣二員前
去監織因 命廷和撰敕于是給事中張原張僑曹懷
解一貫南京御史吳瀚等各上言諫止不報廷和乃抗
疏曰 皇上過聽內局所奏遣官之蘇杭督織 命臣
等撰寫敕書臣惟蘇松杭湖諸府今歲四月以後亢陽
爲害入秋以來霖雨不止災異非常正賦不辦若更令

織造。非惟逃亡。又恐激成他變。况所經過淮揚徐邳等處。軍民田屋漂沒殆盡。幼穉計斤而粥。母子痛哭墜水以死。該部議賑。公私匱乏。臣叨輔導。實切警懼。前項敕書不敢奉。詔撰寫伏望。皇上俯從臺諫所言。收回成命。不勝慶幸。帝謂廷和違抗。切責之。于是廷和移疾。連疏乞休。時有從而媒孽者。遂致仕。給事中葛洪奏乞慰留。不報。

南京地震。大雷電以雪。

是月下弦。地震雷雪連日夜不絕。至明歲元旦。地復大震。南京禮部侍郎劉瑞上言。地震不于他所。而獨于南京。不于他日。而于立春元旦。凡有耳目。莫不駭愕。蓋南

都天下之本而軍民又南都之本也。本安則天下安矣。謹條六事以聞。一曰多發帑藏。二曰嚴督逋負。三曰督察賑濟。四曰修祭告。五曰謹戒備。六曰端大本。帝嘉納之。

附錄正德間錦衣百戶王欽與其弟錦侵負鹽價百有餘萬。嘉靖初逮繫。欽錦論死。長繫臺獄。追贓待報。欽等負緣近倖。忽出。中旨曰。王欽等贓銀。都察院禁繫二年以上。如何不行嚴追。近有旨免死。編戍矣。其勿追。給事中劉濟上言。欽等寬縱之由。臣等歸罪于權倖。請託。陛下則歸罪于該院之延緩。夫奉法不敏。致生弊端。該院之責。夫豈能辭。陛下旣以云然。何不遂奮乾

剛追究欺弊。孰爲延緩。孰爲請託。各置之法。以懾羣姦。知弊而不能革。自古有天下者之大患也。可不戒哉。不報。

時有錦衣李洪。李宣者。以睚眦殺人。止論奪級。濟復上言。國家置三法司。平理庶獄。必使情麗其法。罪協其情。而後已。權姦不得以恩怨爲出入。天子不得以喜怒爲重輕也。今李洪陳宣。罪至殺人。奪級而已。王欽王錦。姦黨亂政。編戍而已。以黃國用視洪宣。以劉宸視錦欽。奚啻天淵。而陛下以一律罪之。其何以示天下也。疏入。不省。

彭澤罷。以金獻民爲兵部尚書。

甲申嘉靖三年春正月丙子五星聚營室。

初元日丙寅歲填次營室丙子五星咸至。辛巳日躔室初度月食于翼五星皆伏而太白獨先過壁光祿少卿樂護時司欽天監上言曰自古五星之聚莫不有大禍大福惟視人君德政淑慝何如耳。占書曰五星之聚是謂改易王者有德受慶子孫蕃昌無德受殃失其國家百姓流亡天道無親福無常主故聚房周祚以昌聚箕齊桓用霸漢興聚井宋盛聚奎是四者皆當更革之際一福一禍昭然在德惟天寶聚于尾箕而唐德弗稱旋有祿山之亂。皇上聖德中興五星適聚可不益修聖德愛養黎元以承大慶乎。易簡寡欲修德之大儉用

省財愛民之實乞。陛下勵精而實行之。占書又曰。天下兵謀。則五星聚于營室。凡內修外攘。以銷夷狄盜賊之謀者。亦不可不加之意也。章下禮部尚書汪俊覆言。正德間。權姦用事。蠹耗無餘。皇上起而救之。道大投艱。付託甚重。拯溺亨屯。求望尤切。宜任老成。斥羣小。崇敬畏。戒逸欲。以爲祈天永命之本。其他禱祀祈禳。不宜輕信。以啟倖門。傷治體。至于足國裕民。必先儉約。端好尚。慎差遣。重爵賞。戒興作。假以數年。生理可復。而國用有餘矣。帝納之。

郊不宴。

初制郊祀畢。宴諸大臣。名曰慶成。至是。帝以災歉。故

不舉。修撰唐臯上言祭祀之禮莫重于郊丘。君臣之情必通于宴享。帝王所以報本始而篤慈惠者。于是乎在。誠禮之不可廢者。况郊則尊祖以配天。孝之至也。宴則受釐而介福。仁之至也。一舉而仁孝之道備。此祖宗之所詳定而垂世守也。豈可偶因水旱例以他宴廢而不舉哉。武宗末年。或曠而不郊。或郊而不宴。神人乖隔。災變頻仍。可近覩也。皇上升潛。百度惟新。而臨御三年。君臣未同一日之歡。非闕典與伏望皇上深惟大報之典。光昭咸備之儀。則神人咸悅。而君臣慶同遊之盛矣。不報。

命北畿河南諸府興修小田。

大理卿鄭岳上言。臣勘事陝西。道經畿內河南諸處。見
大行西倚潼關。東繞懷衛。北極燕薊。其水皆東注南入
于海。盧易滹沱流離潼洛。衛沁洛瀍其大也。宜督居民
瀕水開田。築隄防以障汎溢。鑿溝渠以通灌溉。其平疇
曠土。無川澤之利者。量鑿洫澮。或爲陂塘。下通水泉之
出。上收雨潦之入。每府增置通判一人。以江左諸水利
者居之。督率郡邑。專理農事。則數年之後。皆爲沃壤。而
水旱不足憂矣。章下戶部。侍郎王承裕覆議從之。乃
命各撫按官會同二司。隨宜舉行。

二月。禁內外官交通藩府。

時給事中毛玉勘覈平濠功次。因言內外官不宜交通。

藩府。帝從之。命有宗藩地方。大小官員。但交通納賄者。撫按官指實奏聞。

以太監張準提督京城九門。

司禮監太監扶安傳奉帝旨。以內官監太監張準提督九門。巡視城隍。兵部尚書金獻民上言。額外冗員。宜爲停止。不報。

召督賑侍郎席書。南京刑部主事桂萼。張璠。及兵部主事霍韜詣京。

初楊廷和罷。禮部尚書汪俊請曰。公去誰與主者。適主事侯廷訓據宗法爲大禮辯。遍示羣臣。俊得之。喜曰。違斯議者當斬也。于是吏部尚書喬宇率九卿上言。必以

孝宗爲考。而後太宗爲不絕。倭復會公侯卿佐及翰林臺諫官上言。祖訓兄終弟及以同產言也。皇上爲武宗親弟。自宜考。孝宗母昭聖前後章奏。惟璵韜熊浹與桂萼議同。其他八十餘疏。二百五十餘人。皆如部議。其當從違可知矣。帝曰。更叅衆論議之。給事中張翀等三十有二人。御史鄭本公等三十有一人。各抗章力論。以爲當從衆議。帝怒其朋言亂政。俱奪其俸。修撰唐臯亦言。陛下宜考所後以別正統隆所生。以備尊稱。帝謂臯模稜持兩可。亦奪其俸。于是汪俊等更議干興獻帝。興國太后止。各加一字。以備尊稱。不報。是時楚王榮誠以儀賓沈寶疏上。代府長史李錫

南京都察院經歷黃綰錦衣衛千戶聶能遷各上疏議其言與璵夢議合。帝益心動。乃命取席書璵夢詣京集議。時璵居里中亦並召之。

命婦入覲 興國太后

時興國太后千秋日。命婦各上箋覲賀。宴賚倍常。

逮繫給事中鄧繼曾于詔獄。

繼曾上言。伏見近日中旨多戾。皇言事不考經。文不會理。悅邪說之諂媚。則敕賜褒俞。惡師保之抗言。則漸加放絀。時如正德。可謂極弊矣。尚未有如今日之旨。可駭可嘆者。陛下聰明聖敬。乾乾不息。何至有可駭可嘆之旨。如今日哉。或者左右羣小。乘隙招權。是故出言

無稽。一至于此。若果出自聖翰。亟宜收回。勿吝改過。如左右羣小所爲。尤望速加顯戮。以戒儆人。帝大怒。命遣官校逮繫鎮撫司。嚴加考訊。御史林有孚給事中葛鳴鵬。鄭一鵬。韓楷各上言申救。不報。已而命勿具獄。謫外任。

附錄時南畿饑甚。人相食。巡按淮揚御史朱衣上言。人民爲饑所迫。父子兄弟夫婦之間。多相殘賊。娶婦劉氏。食四歲小兒。百戶姚臣。王堂以子鬻母軍。餘曹洪以弟殺兄。王明以子弑父。無復人理。且地震霧塞。臭彌千里。災變之來。莫此爲甚。更乞大爲賑恤。先是以席書爲戶部侍郎。督賑江淮。發帑截漕賑之。至是以衣言復發帑。

金十五萬兩分賑淮鳳二府州縣。是時四方俱歎盜賊蜂起。閩廣青齊豫楚之間。所在成羣。而廬鳳爲甚。泗州洪澤。嘯聚衆千人。江洋出沒尤多。盜艘給事中張原疏奏乞遣官督剿。從之。仍特敕操江都御史伍文定防禦擒捕。

逮繫試御史朱澍馬明衡陳逅季本員外郎林惟聰于詔獄。

是月晦日。昭聖皇太后聖旦。先期有旨。命婦免入朝賀。朱澍上言。皇上孝事兩宮。常如一日。茲者朝賀之儀在。與國太后旣以舉行。昭聖誕辰。乃聞報罷事體不類。禮數頓殊。傳布之間。關係不小。昭聖

手携神器。親授吾皇。母子之恩。天日在照。陛下之
所以事母后者。宜何如哉。臣謂今日之禮。在母后
雖云固辭。在陛下猶宜敦請。加意舉行。以安太后
之心。以全天子之孝可也。馬明衡亦上言。暫免朝賀。
在尋常固可。然當儀禮紛更之時。正人心勿惶之際。忽
傳報罷。安得無疑。故竊謂此意若出自太后。其間必
有因事拂抑之懷。徃時存沒之感。若出自聖意。則母
子至情有隆無已。豈可以聖旦嘉節。而輟此盛禮哉。疏
入。帝怒曰。命婦免賀。本奉皇太后懿旨。孝養兩宮。
朕豈敢間越。朱淵馬明衡不諳事體。遽赴鎮撫司嚴刑
鞫問。侍郎何孟春論救。不報。已而陳逅奉本刑部員外

郎林惟聰各抗言。馬明衡朱泚不知。太皇懿旨。輒有論列。可謂狂且誣矣。然原其本心。則以爲議禮之初。太后輒不受朝。人將謂陛下之心有所偏主。而姦讒之流。或從而乘間獻媚。以僥富貴。其禍有不可言爾。狂瞽之言。無足深罪。今乃下之詔獄。加以嚴刑。天下聞之。將謂陛下以宮闈之故。罪及言官。本生正統之義。不能無所軒輊。而忠臣義士。且將杜口結舌。不敢復議天下事矣。帝怒其煩擾。亦併逮繫。考訊之。大理卿鄭岳論救。不報。

附錄營龍虎殿守顯靈宮。以奉玄武。御史張曰韜奏乞停止。不報。

三月丙寅奉興獻帝爲本生皇考恭穆獻皇帝興國
太后爲本生母章聖皇太后。

初帝召璵等都御史吳廷舉恐璵至不變初說請敕
諸生及南京大臣耆德舊臣各陳所見以備采擇璵等
乃復上疏申明統嗣之辨璵且曰今之加稱不在皇與
不皇實在考與不考若徒爭一皇字則執政必姑以此
塞今日之議臣恐天下知義禮者仍必議之不已也。
帝嘉納之是日帝御平臺召冕紀宏諭加尊號及議
建室冕對曰臣等願陛下爲堯舜不願爲漢哀帝。
帝曰堯舜之道孝弟而已矣冕等不能對時黃綰亦復
上言申璵等之說帝心愈動乃命輔臣草詔加上尊

號給事中張翀等御史朱實昌等交章力諫。帝切責之。三月丙寅遂敕禮部曰聖母昭聖慈壽皇太后特加尊號爲昭聖康惠慈壽皇太后又敕曰本生父興獻帝本生母興國太后今加稱爲本生皇考恭穆獻皇帝本生母章聖皇太后又曰朕本生父母已有尊稱仍于奉先殿側別立一室盡朕追慕之情禮部尚書汪俊等極諫不報。

汪俊罷。

俊諫立別室不聽乃乞休。帝曰爾職司邦禮違背正典肆慢朕躬卽致仕去。

復召桂萼張璁詣京以席書爲禮部尚書。

先是戶部侍郎胡瓚等上言大禮已定席書督賑江淮實關民命不必徵取來京。帝從之併止璵等勿來時璵等已抵鳳陽矣見邸報。敕加尊號乃復上疏極論兩考之非且曰臣知本生二字決非皇上之心所自裁定也必出禮官之陰術。皇上不察以爲親之之辭爾不知禮官正以此二字爲外之之辭也必亟去二字繼統之義始明而人心信從矣疏入。帝命復召來京。蔣冕言于帝前曰二人若來必撲殺之。帝不問而遣人趣使速來遂降。中旨以書爲禮部尚書給事中安磐等上言大禮之失自霍韜張璵欲考本生而邪說始起自桂萼進席書方獻夫之論而邪說益張乞寢書新

命治萼等奸罪。張漢卿等亦上言。書督賑垂方。煮粥誤民。致死餓莩數萬。宜正國法。以快人心。南京給事中黃仁山等亦上言。書巧詐邪佞。私蓄議藁。而不自進。陰託桂萼代奏。干寵而罔。萼每造書所。必在暮夜。其爲陰類。憊人無疑矣。乞加罷斥。仍復汪俊南道御史田麟等亦上言。汪俊席書邪正相反。進退失宜。且祖制上卿俱推舉簡用。今何取于書。而出自內降耶。乞同罔。萼併黜。以避賢路。俱不報。

夏四月。魯迷貢獅子。

巡撫甘肅都御史陳九疇奏言。魯迷王遣人貢獅子。西牛。西犬。西馬。及河骨刺馬。駝珊瑚珠玉等物。下禮部覆。

議奏獅子等物係非常貢。帝曰既非常貢該地方應
否起送爾部內仍同兵部會議奏聞給事中鄭一鵬上
言西旅貢獒召公作戒越裳獻雉周公爲辭下逮漢唐
猶有却千里馬如文帝不受林邑珠如太宗書之史冊
足爲美談今魯迷所貢諸物。陛下所必屏而不溺者
顧肯輕受爲。聖德累耶又聞洪武初內使奏增虎肉
太祖曰養虎何爲而肉以飼之命以虎送光祿他禽悉
縱今 乾明門諸處禽獸尚多皆仰給大官日費豆稭
以歲計之亦且不貲而魯迷復有此獻獅子諸物俱非
土性所宜受之徒靡國用却之有光 聖猷乞 敕該
部行鎮巡官就彼量賞遣回其獅牛等物一切勿受庶

遠夷知朝廷有不寶遠物之德而潛消窺伺之言矣其乾明門禽獸通行縱放則皇猷益光聖德愈隆章下禮部併詳已而議上竟來京受之

逮繫修撰呂柟編修鄒守益于詔獄

先是禮部侍郎吳一鵬等會侯伯卿貳翰林臺省諸官力言建室之非且曰臣等遵祖訓本禮經守師丹程頤之論以悟聖心姑停建室仍廟安陸歲時遣官奉祭俟異日皇子衆多襲封興王世世承享帝曰朕承天命祇奉宗祀孝養聖母豈敢違逆本生聖母躬親侍養本生皇考荒寢陵園遠在安陸卿等安乎今符同執奏敗父子之倫傷君臣之義欺朕冲年

甚失綱常。其奉先殿西室。亟行修飾。盡朕歲時急切之情。于是呂柟上言。臣嘗論奏建室。未蒙卽從。是臣不能如張純之動主也。獻皇帝封國。忍沒其名。且有二統之嫌。臣嘗請行宗法。反不如冷褒段熲輩之能行也。守益亦上言。陛下徇情以爲孝。羣臣順令以爲忠。此而不已。則陛下獨斷于上。而不顧萬世之公論。羣臣依阿于下。以苟一時之富貴。殆非國家之福也。昔曾元憚于易簣。曾子以爲細人之愛。魯受天子之禮樂。祀周公。孔子傷之。今以非禮祀獻皇帝。陛下安乎。帝大怒。俱逮赴鎮撫司考訊。給事中張紳、董儵等。御史張鵬翰等。交章論救。不報。已而獄具。謫紳解州。守益廣德。

州各判官

附錄鎮守湖廣太監李景儒侵奪府藏需求供億武昌一府歲取金四千餘兩又倡貢鮓之端爲患地方知府某上言景儒供億之病民者十貢鮓之病民者六乞比太祖却人參香米葡萄酒之意罷之不報

已酉上 聖母昭聖皇太后冊寶庚戌上 本生聖母章聖皇太后冊寶

初 命內閣擬撰冊文 帝遣司禮官傳諭欲于 昭聖冊內稱嗣皇帝 獻皇帝冊內稱孝長子 章聖冊內加稱聖母自稱長子 蔣冕等力言不可仍以原文封進 帝覽之御批 獻皇帝冊內加一孝字 章聖冊

內欲去本生母三字。冕等復上言。此字惟宗廟祝文
用之。今稱長子。已盡孝情。又加此字。有干正統。且本生
母三字。係敕諭擬定。亦難輕去。仍封還御批。乃依原
文止稱長子。章聖冊內加一聖字。至是分日各上册
寶明日。帝御奉天殿受賀。布詔天下。詔曰。朕恭膺
天命。嗣承皇兄武宗毅皇帝大統。祇奉宗祀。惟我
皇考孝宗敬皇帝神謨聖政。是繼是行。仰惟聖母昭
聖慈壽皇太后。擁翊之功。莫罄名言。本生父母。興獻
帝。興國太后。鞠育之恩。罔殫報稱。尊稱未極。恒用歛
然恭奉。冊寶加上聖母尊號曰。昭聖康惠慈壽皇
太后。興國太后曰。本生聖母。章聖皇太后。義專隆

于正統禮兼盡夫至情是時張璁至東昌伏讀詔書
歎曰執政忍爲此欺乎兩考並稱綱常尤紊不可但已
也。

蔣冕罷。

初建室議起冕上言皇上旣受命于武宗卽嗣

武宗後以奉宗廟今欲爲本生父立廟將置孝宗

武宗于何地乎願賜罷歸帝曰朕方倚任共圖治

理建室禮儀朕自裁定之旣而冕復上言皇上恭詣

仁壽宮加上尊號聖母昭聖皇太后遽有懿旨免命

婦入賀其故非臣等所知然命書爲禮部尚書璁喜

復取來京聖意所向中外不能無疑恐聖母聞之

亦或不能無疑也。宜追寢前命。不報。冕遂移疾乞去。帝從之。御史王泮等疏留不報。

五月以奉先殿西室爲觀德殿。

欲安獻皇帝主也。禮部侍郎吳一鵬、朱希周、郎中江必東、員外郎翁磐、主事彭黠等上言。獻皇帝主安安陸廟中。神靈攸依。奉先殿西室宜設神位。以便時享。如奉慈殿之儀。不報。

丁丑遣官之安陸改題。獻皇帝主迎如京師。

遣司禮監太監賴義、侯崔元、侍郎吳一鵬之安陸改題神主。奉上冊寶尊號曰。本生皇考恭穆獻皇帝。迎如京師。一鵬等復上言。歷考前代。無自寢園迎入。大內

者况安陸乃啟封之地。獻皇帝神主不宜輕動。惟永祀安陸則本生之情盡。而正統之義得矣。不報。

附錄巡按四川御史范永鑾上言。劉范當逆瑾竊柄。首倡讜論。言獨剴切。後日之禍悉如其言。當時被朴幾死。瑾復檄郡中責穀三百石。輓輸大同。生產殆盡。而御史潘鵬又承瑾意誣范以貪。削籍爲民。良可痛恨。嘉靖初屢起爲知府按察司副使。皆不之官而卒。宜加優卹以旌遺忠。帝從之。爲賜祭葬。復其家。

鴻臚寺少卿胡侍謫補外。

先是霍韜將赴召。倖上言力辨二父兩統之失。而席書在鳳陽亦上大禮。乃議言諸臣講學不明固執私意。

且曰斯禮也。廷臣考舊。自有知者。不敢犯衆。而璵萼等感激不平。力犯羣議。舉朝疾之如讎。仇然甚可畏也。臣途窮矣。尚言此者。九廟神靈使之言耳。及璵萼至京。復同上疏。條七事。極論兩考之非。俱留中不下。侍乃上言。祖訓兄終弟及。蓋嚴嫡庶防。覬覦爾。曾嬰齊不受命歸父。漢病已不受命昭帝。何以受命爲哉。唐睿宗不當兄中宗。宋太宗不當兄藝祖。以其爲君也。不當稱兄。則不當稱伯明矣。帝怒其狂率。出侍爲潞州判官。六月。以吏部尚書兼學士掌詹事府。石瑄爲文淵閣大學士。參預機務。

初。蔣冕罷進。毛紀費宏並爲吏部尚書兼職如故。至是。

乃命石瑤入閣共叅機務

以桂萼張璉爲翰林學士方獻夫爲侍講學士

初萼等來京臺諫官交章攻擊以爲當與席書並正其罪不報旣而至京言者益亟章十餘上俱報聞璉萼上言望皇上親臨便殿集執政禮官面議許臣各執証據典籍以折再詔之誤兩考之非疏入畱中給事中張紳取羣臣彈章奏發刑部令擬璉等罪罰尚書趙鑑私語紳曰若得俞旨便撲殺之帝廉知之遂降中旨命璉等爲學士切責紳鑑罪之

喬宇罷以楊旦爲吏部尚書

初張璉桂萼方獻夫各上疏辭學士命帝曰爾輩忠

諒宜簡在翰林。以成朕納賢之治。宇乃上言。夢等偏執異說。搖動人心。言官論列。殆無虛日。顧俱承翰苑之命。有玷清班。願賜罷黜。帝怒。切責之。宇遂求去。從之。乃召南京吏部楊旦入掌吏部。未任亦致仕。

逮繫御史段續陳相于詔獄。

先是修撰楊慎率同官姚涑編修許成名崔桐等檢討邊憲金臯等上言。臣等所執者。程頤朱熹之緒。夢等所言。冷褒段猶之餘也。學術不同。議論亦異。可能強顏詭隨。和光自媚乎。乞賜罷黜。帝怒。俱奪俸。給事中李學曾等。御史吉崇等亦上言。夢等曲學偏見。違背正統。不加之罪。幸矣。顧隆之清秩。未免爲聖德累也。帝切

責之。段續陳相復各上言。萇等假議禮之名。爲干進之術。陛下不察。加以清秩名器之濫。莫此爲甚。以若人而受若職。臣恐鼯鼠之厲作。而負乘之寇至矣。帝謂排妬忠賢。逮繫鎮撫司獄。名外補之。已而南京尚書楊旦。顏頤壽。沈冬魁。李克嗣。崔文奎。及侍郎陳鳳梧等。都御史鄒文盛。伍文定等。復以爲言。俱切責之。

逮繫員外郎薛蕙于詔獄。

蕙著爲人後解。以駁璫萇之議。其略曰。禮立後者。重大宗也。適子不爲後。重小宗也。爲人後者。爲之子。言雖出公羊。實與儀禮相表裏。旣爲之子。則當稱父矣。而可仍曰伯叔父乎。帝覽之。怒。逮繫詔獄。已而釋之。

逮繫按察司副使劉秉鑑順德府知府羅玉詣京考訊。
太監賴義奉迎。恭穆獻皇帝神主至順德。兵備副使
劉秉鑑倉卒不及迎候。及神主入城。奉于都察院行
署。又不改飾爲行殿狀。義奏之。逮繫秉鑑及玉詣京考
訊。

秋七月改稱本生聖母。章聖皇太后爲聖母。

璵萼旣拜新命。復上言。今日典禮是非同異。願與禮官
論辨明晰。恐其無徵不信也。謹列十三事以上。一曰三
代以前無立後之禮。二曰祖訓亦無立後。三曰孔子射
于矍圃。斥爲人後者。四曰武宗遺詔不言繼嗣。五曰
禮輕本生。父母六曰祖訓侄稱天子爲伯叔父。七

曰漢宣帝光武俱爲其父立皇考廟。八曰朱熹嘗論定
陶事爲壞禮。九曰古者遷國載主。十曰祖訓皇后治
內外事無得干預。十一曰皇上失行。壽安皇太后
三年喪。十二曰新頒詔令決宜重改。十三曰臺諫連
名上疏。勢有所迫。皆條列禮官欺妄之罪。疏入。留中。何
孟春爲論條辨。帝切責之。璵萼復辭職不許。乃就官。
帝采其議。屢遣司禮監官至閣。諭紀等去冊文本生
字。紀等力言不可。亡何。帝御平臺。召紀宏瑤責之曰。
此禮當速改。爾輩事君不忠。如何以禮待爾。又曰。爾輩
無君。欲使朕亦無父乎。紀等惶怖而退。至是。召百官
至左順門。敕曰。本生聖母章聖皇太后。今更定尊號。

曰聖母章聖皇太后。後四日恭上册寶。何孟春退草疏達旦。語禮部侍郎朱希周曰。此禮復更。禮官尤當爭之。于是希周率郎中余才汪必東等上言。皇上孝宗母。昭聖已越三年。今更定之。諭忽從中出。則明詔爲虛文。不足取信于天下後世。祭告爲煩瀆。不能感孚于天地。宗社矣。况本生二字。初無貶辭。去之則于昭聖無別矣。昭聖之心。萬一不安。皇上之心安乎。孟春與尚書秦金等九卿諸臣及學士豐熙等諸翰林與寺部臺諫諸官各上言。力爭本生二字不宜削去。章十三上。俱留中不報。

戊寅羣臣伏哭左順門。逮繫豐熙馬理等百有四十二人。

于詔獄

時帝罷朝。齋居文華殿。金獻民徐文華倡言曰。諸疏
留中。必改。孝宗爲伯考矣。何孟春曰。憲宗朝。尚書
姚夔率百官伏哭文華門。爭慈懿皇太后葬禮。憲
宗從之。此國朝故事也。楊慎曰。國家養士百五十
年。仗節死義。正在今日。王元正張翀等遂遮留羣臣于
金水橋南。曰。萬世瞻仰。在此一舉。不力爭者。共擊之。于
是何孟春金獻民徐文華秦金趙鑑趙璜俞琳朱希周
賈詠豐熙張璧舒芬楊維聰姚涑主思毛玉曹懷鄭一
鵬馬理党以平。余才丁汝夔李春芳鄭曉王國光母德
績等二百二十餘人俱赴左順門。跪伏。有大呼高皇

帝孝宗皇帝者。帝聞之。命司禮監諭退。不去。朱希周復詣內閣。要毛紀費宏石瑤同跪左順門上言。宗廟之禮至大至重。而本生二字爲要。陛下上承天命。以臨九有。所恃者人心爾。若不從人。何以爲治。帝復遣司禮官諭曰。獻皇帝神主將至。冊文祝文俱撰定矣。爾輩姑退。羣臣仍伏不起。自辰迨午。帝怒。命司禮監官錄諸姓名。收繫爲首者。于是收豐熙張翀余翺余寬黃待顯陶滋相世芳母德純八人。下詔獄。楊慎王元正乃撼門大哭。羣臣皆哭。聲震大內。帝大怒。命繫馬理等一百三十有四人。俱下詔獄。何孟春金獻民等八十六人。姑令待罪。

已卯上 聖母章聖皇太后冊寶

庚辰謫學士豐熙給事中張翀御史余翺吏部郎中余寬
戶部郎中黃待顯兵部郎中陶滋刑部郎中相世芳大理
寺寺正母德純等俱戍邊朴羣臣于闕廷編修王相王思
給事中裴紹宗毛玉御史胡瓊張曰韶郎中楊淮員外郎
張潔申良主事臧應奎仵瑜余禎安璽殷承叙等俱卒

初逮繫時羣臣有避匿者悉追繫之併待罪者總二百
有二十人錦衣衛以在繫官上請 帝曰何孟春等入
禁聚哭藐朕冲年爲首者編發戍邊其餘四品以上者
俱奪俸五品以下者杖之于是編修王相等一百八十
餘人各杖有差王相與王思等十有七人俱病創先後

卒。

甲申。恭穆獻皇帝主至。自安陸奉于觀德殿奉爲皇
考。

獻皇帝神主至。帝迎于闕內。奉謁。奉先奉慈二殿。
已乃奉于觀德殿。上册寶尊號曰。皇考恭穆獻皇帝。
不復言本生矣。是日復趣席書來京。

乙酉。大同戍卒殺叅將賈鑑。

初巡撫都御史張文錦議于大同城北九十里建築五
堡徙鎮卒二千五百家戍之。堡五百人。諸卒慮虜躡卽
死。不願徙。訴于文錦。不聽。趣之行。叅將賈鑑望風峻法。
白其不用命。命伍長箠之。且置之理。諸卒遂變。有郭鑑柳

忠者倡亂殺鑑裂其屍嘯聚塞下保焦山自守。

復以僉事陳洸爲給事中。

洸先爲給事中言事忤旨出爲按察司僉事至是上言曰陛下察幾致決毅然去本生二字有人心者咸謂始全父子之恩無不感泣若不布詔天下猶爲未明更乞罷喬宇夏良勝以息邪說復吏道于桂曹嘉以作正氣帝悅復以洸爲給事中

復逮繫修撰楊慎編修王元正給事中劉濟安磐張漢卿張原御史王時柯于詔獄復朴之張原卒謫楊慎主元正劉濟戍邊。

帝怒愼等不已復命逮繫責之曰楊慎王元正劉濟倡

率喧譁震驚廷闕。其加杖編戍安磐等俱加杖削籍。張原灰杖下。

調吏部侍郎何孟春于南京工部。毛紀罷。

帝怒何孟春調南京工部復詰責紀等不已。紀因求解職。帝曰爾因辭奏諫歸咎朕躬。豈大臣忠愛之道罷之。

大同叛卒殺巡撫都御史張文錦。

文錦恐郭鑑等北與虜連招使入城既入卽索首謀者郭鑑柳忠遂脅諸卒焚府門劫獄囚又焚都察院門譁厯突城中大震文錦倉皇踰垣匿博野王所諸卒突入官廨略其家復脅博野出文錦殺之亦裂其屍乃發

府庫兵盡甲而馳欲殺鎮守內臣不果又欲殺總兵官江桓桓走免略其家乃出逮繫故總兵朱振于獄脅令主之振不能止與約三事曰勿犯宗藩勿略帑庾勿縱火肆殺從我則可諸卒曰諾振乃戢衆稍就約束已而脅鎮巡官代奏乞宥時月之二十有七日也

附錄南寧伯毛良上言廷和要定策功沮撓大禮使陛下失天倫之正廢追崇之典其罪甚矣千戶聶能遷百戶陳紀教諭王价錄事錢子威各論奏議禮差謬更正得宜俱畱中不報

八月以吏部侍郎賈誼爲禮部尚書兼文淵閣大學士兼預機務

代王出居宣府。

先是廷議遣兵部侍郎李昆齎敕赦諸叛卒以大監武忠代王某鎮守以都督桂勇爲總兵以按察使蔡天祐爲僉都御史巡撫其地戢之諸叛卒雖勉聽朱振約束猶肆劫掠不用振命振箠殺二十餘人竟不能制及天祐至會武忠桂勇及振集諸叛卒諭以朝廷恩威反覆開諭諸卒頓首謝暫爲解散然皆恐不安又姦盜多乘隙誘諸卒劫掠居民桂勇督兵分捕箠死五十餘人復咎鑑忠等釋之以安衆心衆稍定亡何有別鎮衆將李賢者率兵赴陝西道出大同其衆掠民禾畜居民詈之衆詭曰爾大同謀叛朝廷命吾將盡剿之而尚

各禾畜爲耶。于是轉相告言有洗城之說。又有妄傳京營諸鎮兵已駐近地者。諸叛卒益懼。而戶部進士李枝者。輒餉適至鎮。衆益懼。謂有密旨。遂夜集數百人。排枝闢問故。枝出公移。門隙中示之。始信。而衆旣夜聚不能散。乃咎大同知縣王文昌。曾勸鎮巡官嚴馭諸卒。遂往圍之。文昌匿走。得不死。衆乃縱火焚燒居民數百家。亂復大作。明日逼脅代王索金帛。王曲應之。衆始解散。王懼微服率子弟潛出。居于宣府。天祐等諭撫不定。復以狀聞。

土魯番寇甘州。

速壇滿速兒與其將牙木蘭火者他只丁。率衆寇甘州。

都御史陳九疇屬衆出擊。蒲速兒走肅州。九疇問道抵肅州。內外合擊。大破之。殺其將火者他只丁。番衆遁去。路遇亦不剌兵。復邀擊之。大創而歸。

崔銑罷。

時席書至京。以孝宗考名未正。悉發諸議留中者。

命禮部集議。鄭岳徐文華仍力言。孝宗祝享。昭聖

冊寶尊奉已久。不宜輕改。帝切責之。胡世寧時居憂

里中。亦上言大禮之議。惟在聖心獨斷。早定而已。或

謂陛下當考孝宗使獻皇帝承統。亦將考孝

宗乎。或謂獻皇帝不得追崇。顧不得比武王之追王

太季乎。或謂宜系興國于帝后之上。隆新典而仍舊

號可乎。或謂宜立廟安陸。獻皇帝生。陛下一人而別廟于外藩可乎。帝嘉之。祭酒崔銑上言。陛下求備禮于本生。至孝也。然當詳稽禮義大順人情。夫絕世者人之大痛也。先王本其氣之所來。故取同宗者爲後。若夫帝統必以長一統序也。繼絕必以弟。防立後也。陛下爲弟而長。以倫序則考。孝宗是故必降于所生。斯謂之後。若于所後等。猶弗後也。陛下無輕正統。無拂羣情。無恃威可作。無謂已可縱。則今日之忠邪辨矣。帝怒奪其官。

九月改稱孝宗敬皇帝爲皇伯考。昭聖皇太后爲皇伯母。

初集議時汪偉鄭岳徐文華等猶與璉等力辯可否武
定侯郭勛遽曰。祖訓如是古禮如是璉等言當。書曰
人臣事君當將順其美。于是書璉璉及獻夫會公鶴齡
侯勛仇鸞等六十有四上言三代之法父歿子繼兄終
弟及。今孝宗有武宗爲嗣未嘗更立。皇上古天
子無大宗小宗無所生所後禮經所載爲人後之說乃
大夫與士之禮也。夫人無二本。孝宗伯也宜稱曰皇
伯考。昭聖伯母也宜稱曰皇伯母。允合天理之正。深
卽人心之安。大統大倫兩有歸矣。獻皇帝主別立禰
室不入太廟尊尊親親兩不悖矣。議上從之。乃改稱
孝宗爲皇伯考。昭聖爲皇伯母。祭告天地。宗廟布

詔天下。詔曰。人君爲治。必本于孝道。聖人論政。必先于正名。孝在篤于親。而名貴循其實。朕本憲宗純皇帝之孫。孝宗敬皇帝之侄。恭穆獻皇帝之子。皇兄武宗毅皇帝。上賓之日。仰遵祖訓。遺詔。命朕嗣皇帝位。受天明命于茲三年矣。尊稱大禮。屢命廷臣集議。輒引漢定陶王。宋濮王爲據。至再至三。其論未定。朕心靡寧。蓋漢宋二帝。嘗爲立子。朕則入奉宗祧。與爲人後者不同。是豈徒禮官之失。亦朕冲年。未能決擇之咎。朕祇承九廟。尊養二宮。正統大義。未嘗有間。惟恭穆獻皇帝。章聖皇太后。朕之父母也。劬勞之恩。昊天罔極。雖位號已隆。而名稱未正。因心之孝。每用歉然。今

告于天地 宗廟社稷稱 孝宗敬皇帝曰皇伯考
昭聖皇太后曰皇伯母 恭穆獻皇帝曰皇考 章聖
皇太后曰聖母各正厥名揆之倫序允協無背猶慮天
下臣民未能知悉特茲詔諭以申朕拳拳孝養之誠乃
閣臣宏等所草也

潞盜陳卿據青牟山以叛

卿初爲 潘府長史司吏棄之嘯聚千餘人據青牟山
叛流劫潞州諸縣及河南懷慶地方官兵不能制

以侍郎胡瓚都督魯綱帥師討大同叛卒

天祐奏至 廷議遣戶部侍郎胡瓚督兵魯綱總兵往
討之 勅誅首惡脅從不問

議遷顯陵

初帝名安陸松林山陵爲顯陵北七陵焉及大禮
既定百戶隨全等請改遷顯陵下工部議尚書趙璜
侍郎童瑞陳雍等上言顯陵爲先皇帝體魄所安
不可輕犯山川靈秀所萃不可輕泄國家根本所在
不可輕動太祖不遷皇陵太宗不遷孝陵願
以爲法帝命禮部會多官集議尚書席書侍郎朱希
周李時等會公侯九卿翰林臺諫諸臣上言臣等伏聞
顯陵勢如伏鳳氣結盤龍此實山川之勝帝王之幽
宅也隨全等乃肆妄議乞治其罪帝曰先陵遠在
安陸朕瞻仰哀切其再議之書與璉萼等復上言臣等

感陛下哀慕之誠仰聖人孝思之至但舉大事當順人心今多官皆曰帝鬼不可輕動地靈不可輕泄人心如此可不信從一時或誤千載難追臣等不敢不盡言帝乃罷議命顯陵祭如七陵以兵部尚書金獻民都督杭雄帥師討土魯番

初河西守臣聞番寇大舉愁九疇不能却敵遂上言河西危急狀乞大發兵援之廷議請以本兵大臣親出督師乃命獻民及雄徵沿邊鎮兵往討焉比獻民至蘭州而寇已出嘉峪矣乃用九疇策請遷發諸夷使置之嶺南閉關絕貢以靖西陲從之九疇以大捷聞言速壇滿速兒中流矢歿矣朝廷信之賞賚有差巡按御史

王官上言獻民總制不如彭澤因薦故巡撫馬昊故侍郎馮清僉事王百之不報。

冬十月起廖紀爲吏部尚書。

紀先以南兵部致仕至是起用。

十有一月復以閩閩史道于桂爲給事中曹嘉爲御史。

給事中陳洸請復閩閩等原官。帝從之閩等俱辭下吏部覆議仍以于桂爲知府史道閩閩爲僉事嘉復原職。

逮繫浙江布政使馬卿及杭州府知府查仲道等詣京考訊。

初太監吳勲少監王士聰以敕命監織杭州怙寵驕

悍縱其舍中兒廝養諸役摧剥工匠恫喝郡縣無所顧忌布政使馬卿憤懣稍鈐束之不能制而絲綵工顧悉杭州府帑金給之有所關發其舍中兒廝養輒索美金什之二三知府查仲道輒白卿有所禁沮勲遂奏卿等遠以往復儀節日與卿相構誚卿不爲遜勲遂奏卿等違抗明旨稽誤工作帝大怒命逮繫卿等詣京考訊。

逮繫御史任洛易州兵備副使任忠于詔獄。

洛爲京民陳彥章所訐忠呈白洛寃罪人俱逮繫詔獄時又有光祿卿樂護華湘者爲屬官馬能所誣亦送法司鞠理竟降中旨奪級外補之。

胡瓚魯綱帥師次陽和堡。

瓚督兵已出居庸而巡按宣大御史王官上言瓚等督兵聲討人心動搖恐諸叛卒爲謀益堅不若出其不意擒之乞諭瓚等寢兵密敕臣等選宣府精銳潛約大同巡兵內外合擊必能擒賊不効則置臣于理然後命瓚發兵爲計未晚章下兵部左侍郎李昆覆言官策良是第師已出關勢難中止宜令瓚駐兵宣府督大同鎮巡官計擒首謀若罪人斯得卽奏班師仍有他變督師進討更命王官協同贊決兼核功罪從之。

盜殺山海關主事王冕。

妖人李伯川沈雄等詭稱商販入關殺歿守關主事王

冕事聞。兵部奏行薊遼巡撫劉澤張璉緝捕盜賊嚴禁白蓮左道。已而御史劉紳請贈冕官以勵臣節。帝從之。

大同叛卒執總兵官桂勇。

璣至陽和。密檄桂勇督城中兵擒捕首謀者。羽檄日數下。城中大懼。諸卒訴天祐求全。天祐曰。惟誅首謀耳。餘固不問也。爾輩勿助惡。卽免矣。衆懼稍釋。桂勇遂率諸將擒郭鑑柳忠等十一人斬之。鑑父郭疤子忿怒。復倡亂。糾叛卒胡雄黃臣徐璫兒等煽惑諸卒。盡甲而馳。分閉諸城門。喧呶不已。迨夜圍勇第破之。掠其貲。殺其廝養卒數人。盡磔其屍。生啖之。遂執勇幽于葉總兵第。欲

鬻焉。天祐聞變，約武忠亟馳至，反覆諭曉，勇得不遇害。諸卒羅訴天祐求止兵，天祐曰：「若等實自作孽，奈何能擒獻首惡？兵猶可及止也。」諸卒乃擒徐龜兒等四人以獻。天祐斬之。郭庖子暨諸首惡竟跳匿。瓚聞之，欲提兵而西。天祐函鑑等首送瓚處。城中士人數十輩亦詣瓚，請緩師不聽。天祐乃上言乞班師。復遺書瓚謂首惡旣誅，餘黨遊釜魚耳，固易制也。瓚乃止。

大同縣庫胥殺知縣王文昌。

庫胥許奈侵牟庫金數千兩，慮覺抵罪，乃乘亂縱火焚燬縣署。文昌聞變，倉皇自殺。

十有二月，謫評事常商臣補外職。

商臣上言。臣自今年七月授官以來。見以大禮伏闕觸犯。聖怒大臣改任者何孟春一人。編戍者學士豐熙等八人。決杖死者編修王思等十有七人。以忤使臣而逮繫者。副使劉秉鑑。知府羅玉等。若而人以織造抗使。臣逮繫者。布政使馬卿。知府查仲道等。若而人以失儀下獄者。御史葉奇。主事蔡乾等五人。以京堂官爲所屬。訐奏下獄者。御史任洛。副使任忠等二人。此皆國家大獄。上干天象。下駭民俗。所關甚鉅者也。臣不敢愛死。妄以爲伏闕諸臣。狂直之罪。固有之矣。然而當宥者有三。以迎送織造逮繫諸臣。踈戇之罪。容有之矣。然其當宥者有四。失儀者。非敬之不至。乃其敬之過甚所致。足

過也。非故也。宥過者無大小。被訐者不足惜。所惜者朝廷之大體。廉遠地則堂高。臣聞之道路。凡此皆非陛下之本意。或有左右其間耳。望陛下大奮明斷。將諸臣錄復其官。及其子孫。庶不失欽恤之意爾。帝怒。外補之。

胡瓚魯綱自陽和堡班師。

初巡撫宣府都御史張縉叅謀郎中趙錦各揭報桂勇擒斬首惡十餘人。兵備以請。帝曰。須擒勦盡絕。提督官奏報裁處。及天祐疏至。帝從之。乃命瓚等班師。瓚上言。叛賊就擒。人心安定。宜加恩大臣臺諫諸臣。以旌勞勩。御史蕭一中給事中鄭一鵬各上言。大同構亂。

廟堂之上。一籌莫畫。大臣臺諫何功可錄。且宣府巡撫張縉。巡按王官。山西巡撫劉麟。俱未有聲援之助。何可加恩而瓚討叛無功。逆黨未盡。乃師不臨城而歸。欲冒功賞。欺罔甚矣。乞治瓚罪。別遣大臣督兵進討。不報。仍敕天祐再擒餘黨。勿問脅從。

代王還大同。

時亂已稍定。帝諭代王還國。王乃復入大同。乙酉。嘉靖四年春正月。起楊一清爲兵部尚書。提督陝西軍務。

一清正德間。以少傅兼太子太傅。吏部尚書。武英殿大學士致仕。嘉靖初。吏部尚書喬宇舉一清總制陝西。有

命需用不必煩以邊事。及甯嘉劾字及之。乃止。至是給事中鄭自璧請取金獻民還京。乃起一清代獻民。一清馳至陝西。道洛陽。造故大學士劉健。于是健年九十三矣。辭以疾不見。一清歎伺久之。健冒絨幘。袒褐出。曰。應寧而嘗入相矣。復出將乎。一清曰。承乏爾。健出。既茗飲之。他無一語。

命織幣諸郡改貢幣金。

寧波府知府楊最上言。本郡僻處海隅。繒綺薄惡。每歲所貢皆市自杭嘉克之。乞改貢料。值供用。下工部復議從之。乃命今歲諸郡歲織諸幣。已具者貢幣。未具者貢金。

虜殺冀北道僉事田美。

總督侍郎胡璘檄美整備渾源應朔諸州軍餉道遇虜寇殺之。御史劉翀請贈官從之。

〔附錄〕戶部尚書秦金上言。曰者淮揚饑饉。人民相食。

陛下軫念元元。遣官分賑。至於發帑金截漕米。益以鹽值勸分。惠至渥也。而侍郎席書都御史胡錠。荷承重寄。區畫多方。第以委任失人。關防欠密。流離死亡之禍。反多于未賑之前。侵牟冒濫之姦。乃見于旣覈之後。言官論列。不爲無憑。二臣罪責。殆亦難逭。但思救荒本無奇策。知人又自古所難者。宜錄其勤勞。矜其過誤。可也。從之。

以胡世寧爲兵部侍郎。

世寧先以吏部侍郎丁艱去位。憂中獻大禮議。其言與張桂合。帝嘉之。服闋復上言。臣衰病不能赴闕。先陳治道急務以效愚忠。曾子有言。人之將死。其言也善。臣病日急。恐一朝溘死。是以盡言至此。惟陛下憐之。其中有曰。內臣不無姦佞。然亦有忠勤體國者。惟時察而慎檢之。則可無前代之禍。數年以前。內臣鎮守。剝民膏血。致多災變。自陛下臨馭以來。鎮守無剝削者。而江淮以南。赤地千里。父子相食。無乃臣等文職營私所致。今藩臬守令。皆不得行其職。惟承命于巡按一人而已。目有限。將若之何。此民之所以死。亡枕藉。莫之能卹也。

又曰言官不可不擇宜 敕吏部選內外郎官忠直公
慎識治體當爲之又曰席書以達禮受知擢居禮部或
相驚訝此因材而受秩何嫌之有 帝嘉納之起爲兵
部侍郎御史曹弘劾世寧姦譎導諛大負平生乞 賜
罷斥不報世寧至京復上講議三章乞留中看覽其一
大學秦誓章詳繹容賢嫉賢之利病而極言仁君逐惡
之嚴以致意于 帝其二尚書惟辟作福章甚言大臣
擅威福之患在 英君必察而討其罪且曰我 太祖
獨秉全智革去丞相以爲子孫萬世之法 太宗簡用
儒臣咨訪政治不驟加以極品不拘內外新舊執事
仁宗 宣宗間選尚書夏原吉等商確擬旨亦絕無偏

重之勢。英宗選用重臣，必召吏部面商可否。憲宗始令吏部會推材望。孝宗簡用下位，不用崇職，俱稱得人。今內閣日隆，羣臣尊仰，限用翰林院官，原係內閣教養門生，方得選用。吏部不得擬其陞除，不許擅授外職，歷練民事。其餘內外官員，雖有文學材智，不許再入私訛相傳，謬稱舊制，以欺後進，以箝衆口。下視六卿，若其屬吏，後先相承，必其門生子弟，遞爲受授。後者未遇感前人之接引，前者既衰，責後人之報施，凡身後贈諡、恩卹，不論忠佞，一皆預爲已地，盡力爲之。至于纂修國史，私其黨類，善惡倒置，褒貶任意。此自古所無之大弊也。是威福予奪，盡歸于一官矣。使得其人，如先朝楊

士奇等及今石瑤之忠清楊一清之才識可也不幸而有媚嫉者濫其位則排斥忠賢引用兇邪國事日可憂矣陛下昔用席書爲禮部舉朝皆以爲非攻擊不已而首相用賈詠掌誥敕遂入內閣舉朝略無異議今二臣日侍左右其忠猷才力陛下豈有不知而何用于陛下者如此用于首相者如彼人心所向益若是矣今陛下召用楊一清天下之福而言者多方計沮欲久留一清于邊意有所向勢有所畏也陛下視今之威福出于誰乎易戒履霜識者深憂故在內者危迫而不自安在外者畏縮而不敢求進也惟聖明早加省悟宗社生民幸甚其三周易不出戶庭无咎章

反覆于君臣不密失臣失身之指疏入留中。給事中余
經管律劾世寧疏請留中。將放告密之風乞 賜罷斥。
世寧不能已乞歸不聽。而言者益亟章數至。乃改世寧
南京吏部。

附錄御史劉紳上言十事。一緝聖學。二近正人。三遠佞
人。四畏天變。五恤民隱。六容諫諍。七立紀綱。八平賞罰。
九廣恩威。十設總制。皆有所規勸不報。巡撫江西都御
史陳洪謨上言伏覩 詔書有云昔者孝未遂于尊親
事多拂于天性。君臣之際未免少乖。舉措之間或多違
戾。今彝倫攸叙。大禮告成。朕方欲同心以和典禮之業。
故事以建臣民之極。爾內外諸司宜體朕意有官守者

修其職有言責者盡其忠。凡舊章未復。弊政未除。八
未用。民生未安。邊備未飭。軍儲未克。一切有補于政理。
利于軍國者。條具奏聞。朕將舉而行之。期得萬國之歡
心。致天人之佑助。以成至治。以全大孝。則朕之志于是
慰矣。臣聞諸禮曰。子之事親也。三諫而不聽。則號泣而
隨之。前者廷臣因議大禮未當。聖心俯伏號泣于
殿陛之間。誠亦有罪。然揆之于禮。則亦臣子事君父
之常耳。豈可深以爲異乎。况何孟春。豐熙等。操履醇固。
宜置左右以資啟沃。呂柟。楊慎等。論思有體。宜出入禁
闥以責後效。張原。毛玉等。身後無以爲殮。妻孥流落。尤
爲可憫。如蒙皇上曲賜優貸。使遷謫者得以效用。

物故者可以自慰。所謂有裨政理者。莫急于此。而得萬國之歡心。致天人之佑助。或亦不出于此矣。疏入。留中。不報。

二月。土魯番寇肅州。

牙木蘭復據哈密。率衆入沙州。侵及肅州。

日本使宋素卿伏誅。

初宗設肆掠。後匿入海嶽。獨素卿及瑞佐就執。下獄待訊。廷議備責沿海備倭官。緝捕宗設。無所得。而朝鮮兵徼海者。得其魁仲林望。古多羅。及倭首三十。有三被鹵華人八。其國王李懌奏獻。闕下。于是給事中劉穆巡按御史王道奉。命按覈矣。乃發仲林望等至浙。令

穆道責與素卿對簿。備鞠遣貢先後。及符驗真僞。穆道鞠審明悉。以爰書上請。乃論素卿叛正。仲林望古多羅。故殺各斬。瑞佐等釋還本國。

論曰。鄭瑞簡有言。當是時。給事中夏言上言。倭禍起于市舶。禮部遂請罷市舶。而不知所當罷者。市舶內臣。非市舶也。夷中百貨。皆中國不可缺。故祖訓雖絕日本。而市舶司不廢。蓋以通華夷之情。遷有無之貨。收征商之利。減戍守之費。又以禁海賈。抑姦商。使利權在上也。市舶罷而利孔在下。姦豪外交內訬。海上無寧日矣。噫。斯言不爲無見。猶非窮本之論也。蓋姦商貴官家。負欠船金。固爲厲階。然使番舶不至。則姦商貴官家。又何從

誑取其貨。負欠其金。以階厲耶。故靖海之道。唯絕番舶。嚴海禁而已。夷貨非衣食所急。何謂中國不可缺耶。絕之則內外隔。而相構之釁無由生矣。夷雖欲窺伺我也。何可得耶。然朱統嚴其令。而言者紛紛。則衣冠之盜。甚于夷狄也。統去。禁弛。不旋踵而蹂躪之禍。半天下。市舶內臣所爲乎。經國者可以深長思矣。

大同叛卒復亂

郭疤子胡雄潛入城中。知其不終容也。復煽誘餘黨。數十百人。夜圍王總兵居第。焚之。諸卒馳白天祐。天祐曰。俟曉當治之。詰朝集諸卒。諭以朝廷班師至仁。且詰亂故。衆曰。倡亂有主名。皆知之。請閉諸城門。大索可得。

也。天祐藉其名。如言索之。乃獲庖子等四十人。悉斬以徇。復厚賚間諜。因事捕誅餘黨。殆數百人。大同始定。事聞。帝優詔答之。後遷兵部侍郎。言者以靡財追効。竟罷去。

論曰。五堡之變。或者咎天討不急。遺數年邊地之禍云。是必欲大師臨城。如後日劉源清所爲爲快也。則城中宗藩何罪。居士民何罪。守土郡邑官何罪。而故棄之。欲與賊同戮耶。卽不欲戮。宗藩等賊能不執辱之爲質。以要我。或剽掠魚肉之以資固守。殘殺磔轢。喝嚇我師哉。而胡不憶慮爲也。然則坐視其亂。不一懲創與。曰。方其嘯聚焦山時。議討可爾。招之入城。則諄矣。當是時。

螳聚豕突中無觸機猝辦之材爲之主畫固未必卽與虜連也爲文錦者能密檄各屯兵尅期圍剿則雖二千五百人亦可一一而擒矣况衆卒求自全者迫于聲討未必不擒獻渠魁而伏我鈇質也儻有潰圍而狼奔則又預杜諸城門勿使得入嚴申邊徼勿使得出而麾我師橫擊山谷間彼能假羽而跳去耶計不出此而開門以延盜雜蛇虺而羣居其中乃索首惡而欲磔之此文錦自取殺身之禍也繼事者處此爲謀實難則亦宣諭國威離散其黨與推布誠信銷釋其反側然後微刺主名榜之通衢卽發銳卒按名撈縛之遍諭諸卒無坐名者不問則諸惡雖欲煽惑誰其從之哉天祐之智復不

及此又致大亂而聞之朝。朝議復閣于幾。遣大臣率師以討之。吾不知瓚果臨城將何筴以擒諸兇也。萬一不逞者。嬰城固守。而肆螫于宗藩居士民。則將縱火崑岡以焚之耶。然則駐師陽和。未必爲失計矣。惜天祐處之。復爾垂方。又致有桂勇之執。岌岌殆哉。第其身居危地。不避艱難。反復譬曉。芟夷禍亂。卒剪羣兇。而戡定之。噫亦難矣。言者顧劾其靡財。謂之何耶。胡瓚督兵中止。而欲貪功以冒賞。蕭鄭之劾有以也。劉源清以爲師不臨城之咎。則謬矣。

三月。纂獻皇帝實錄。

勅曰。皇考恭穆獻皇帝。嘉言善行。可以大書特書。不

止一端。宜有紀述。以垂萬世。其以大學士費宏石璫賈詠爲總裁官。侍郎溫仁和學士董玘副之。共領其事。遣寺丞周璧之安陸采遺事。

附錄給事中陳洸疏言。尚書楊旦侍郎汪偉朋邪亂正。俱罷之。已而洸以他事解職。聽按覈。尚書席書欲有紛更。帝諭止之。學士方獻夫上疏乞歸。帝諭令安靜。御史劉黻上言。近日大禮已成。詔示中外。人心悅服。天下想望治平。夫何在廷之臣。不能仰體聖懷。共成化理。一有論列。輒以朋黨形之。章奏臣以此爲前代頽衰之風。不可啟其端于治平之世也。如楊旦汪偉俱先朝舊臣。不聞有過。而給事中陳洸一旦摺拾。指爲朋邪。

擊之使歸。此不可解也。近日議禮之臣各執己見。願
陛下明斷羣情。翕然席書言事。欲有紛更。屢蒙聖諭。
量必知檢陳洸事有案牘。家令退避聽覈。公道自明。方
獻夫乞歸。又蒙特旨。諭以安靜。聖心于此已洞見羣
下之情矣。然常人之情不懲則不知所警。望賜天語。
戒飭務使勞而不伐。有功而不德。百僚師師以成嘉靖
之治可也。臣又聞陸贄曰。諫者多。表我之能。受諫者直。
示我之能。賢諫者狂。誣彰我之能好。諫者直洩。示我之
能容。然則法祖親賢。聽言納諫。此君人之體也。伏望
陛下察忠邪之分。明理亂之原。舊章成憲。不宜妄更。老
臣耆舊。不宜速遠。楊旦汪偉。察其無過。悉召還之。以言

得罪及議禮謫戍之臣宜量移內地復其原職。從事者矜卹其家以示大造之仁可也不報。

夏四月議立太廟世室。

先是光祿寺署丞何淵上言。孝莫大于享親。禮莫大于宗廟。恭穆獻皇帝乃入繼大統所自出之帝。請于

太廟內立世室。以爲禰廟。宗祀。獻皇帝則禰廟得所。

正統有光。帝命禮部集議。尚書席書等上議。王制天子七廟三昭三穆。周以文武有大功德乃立世室。與后稷廟皆百世不遷。我太祖立四親廟。德祖居北。後改同堂異室。議祧則以太祖擬文世室。太宗擬武世室。今獻皇帝以藩王追崇帝號。何淵乃欲比之。

太祖太宗立世室于太廟不知何據也不報張璠桂萼亦上言不可璠曰臣與廷臣抗論之初卽曰當改爲獻皇帝立廟京師又曰別立祔廟不干正統此非臣一人之私天下萬世之公議也今淵乃以獻皇帝爲自出之帝比周文武不經甚矣上于九廟之威監下駭四海之人心臣不敢不爲皇上言之昔漢哀帝尊定陶共王爲共皇立廟京師比孝元帝至今非之今淵請入獻皇帝于太廟不知序于武宗之上與武宗之下與昔人謂孝子之心無窮分則有限得爲而不爲與不得爲而爲之均爲不孝別立祔廟禮之得爲者也此臣昧死勸皇上爲之入于太廟禮之不得爲者也

此臣昧死勸。皇上勿爲萼曰何淵假議禮之名懷姦
邪之術妄爲世室之擬。臣聞仲尼有言。孝子不順情以
危親。忠臣不兆奸以陷君。如淵所謂陷君者也。皇上
可順情而信之乎。是禮由漢以來。今日獲明。曾謂能定
千古之典。有不能替月守乎。曾謂自我作則。復容人破
壞乎。疏入。帝曰。侯會議審處。席書乃會羣臣復上議。
獻皇帝入祀大內。于禮爲宜。將祔祭。太廟則昭穆
難亂。正統難干。將別立一廟于太廟旁。是兩廟兩說
矣。帝仍命會議。瑰萼復上書爭之。有曰。使獻帝當
入太廟。臣等當先言之。何待何淵。豈臣等前日之言
是。今日之言非邪。前日之心忠。今日之心不忠耶。記曰。

君者。立于無過之地也。臣等豈敢背理曲從。以誤皇
上哉。書亦復會羣臣上議爭之。帝曰。朕奉天法。祖
豈敢有干。太廟第。觀德殿在。大內。太常不與祀
禮。匪合儀制。所議反復。違禮背經。宜將三代典章。博考
以聞。于是大學士費宏。石瑄。賈詠。上言。太廟昭穆相
承。必繼統者。乃得升祔。未有由別廟入祔者。此羣臣不
敢從淵說也。若禮有可通。席書爲禮官。嘗議大禮。以成
聖孝。亦何爲執奏以取違。命之罪哉。尚書廖紀。秦金
等。及九卿臺諫官。各上疏力爭。俱不報。璵。夢乃謂書曰。
觀德殿規制。宜未備。宜。聖心未慊也。須別立廟。不干
太廟。尊尊親親。並行不悖。可也。書等遂上議。宜于皇

城內擇地別立禰廟。不與太廟並列。祭用次日。尊尊親親。庶爲兩全。從之。乃命卜地。擬名以聞。而世室之議寢矣。

論曰。初永嘉等議正考名。衆咸以逢君斥之。故其說久而後定。雖永嘉等亦終負謗。亡能自解。所可自信及持以厭衆口者。亦惟以自考其考。亡干大統耳。豈知淵等闕伺遽欲以此爲巷遇計耶。然淵言之。帝心卽動。亦永嘉等有以先之耳。曩議大禮。璉曰。三代世及。無爲人後者。爲人後。漢魏以來事也。而淵輒謂獻皇帝爲皇所自出之帝。欲比周之文武世室祀之。帝亦命禮官博求三代典禮。以問。遂皆以後世爲不足法。而求之。

上古矣。然三代而上實未有爲人後而爲天子者。黃帝三子。長玄囂。次昌意。黃帝沒而昌意之子顓頊實承帝統。顓頊沒而玄囂之孫禹極之子。帝嚳繼立。是嚳爲顓頊之再從子。而昌意之從孫。當時固不聞考顓頊亦不聞追帝其父祖。又何聞奉嚳極之主于黃帝之廟乎。舜祖顓頊而宗堯。禹祖顓頊而宗舜。是瞽瞍不得爲宗也。不得爲宗。得與堯舜而並享乎。永嘉等有見于是。故始而力破爲後之說。繼而堅阻入廟之議。中正之典。復于旣隳。弼一人于三代之隆。亦云韙矣。惜其立廟之議守之弗確。始于大內。中于廟旁。終爲世廟屢遷就而不恤。致使帝心靡一。因人更易。卒納分宜之誑。

而宗祀于太廟。永嘉不得辭其責矣。

仁壽宮災。

昭聖皇太后所居也。至是焚蕪。玉德安喜景福等殿俱燼。帝爲減膳徹樂。素衣避殿。告于天地。宗社。敕諭羣臣同心修省。于是給事中楊言等上言。臣聞變不虛生。感召有自。近者仁壽宮災。皇上特諭羣臣同加修省。陛下之心。成湯高宗警懼之心也。天變異宜。至哉。益責在公卿有司。而不在陛下。罪在諫官。而不在聖躬。朝廷設六科給事中。所以舉正欺弊而欺弊日積。天譴曷逃。吏科失職。致陛下賢否混淆。進退失當。林俊。蔣冕。豐熙。張漢卿等。見幾引去。抗諫謫死。而張璁。

桂萼始捷徑以獵清秩終怙勢以誣重臣戶科失職致
陛下儉朴不聞而陽和土田張崙等請索無厭鹽商吊
引崔和等餒饕亡忌禮科失職致陛下享祀未孚而
廟社精靈無忭懽之庇兵科失職致陛下法度廢弛
而錦衣衛多濫職山海關剗權分匠役增收五百奏帶
陞授員多刑科失職致陛下刑罰不中而元惡如藍
華等脫籍沒之法諍臣如郭梈等施桎械之刑工科失
職致陛下工作不常而局官陸宣等乞全支俸薪內
監陳林等請權取木植凡此數端乃時弊之重且大者
所以拂天理逆人心傷和氣者多矣故皇天赫怒示
以大變以顯諫官不職之罪也伏望陛下益崇敬畏

之心。克念災變之由。進君子。退小人。還謫戍之官。卹筆
灰之後鹽課。士田。蘓商民之困。權分押解。免征市之食。
當籍沒者。正其法。加桎械者。亮其忠。濫帶冒賞者。明其
罪。乞陞千俸者。削其官。將臣等。罷斥以彰不職。別選賢
能以克任使。如此而天變不弭。治理不臻。臣未之聞矣。
御史涂敬等上言。最易回者。天之心。最易感者。人之心。
最不可欺者。已之心。人主欲知其過。惟求諸已心而已。
已心無愧。則人心可感。而天意可回矣。皇上有帝王
之仁。帝王之度。帝王之勤。帝王之明。天下翹首跂足以
爲太平之期。期月可致。而災異頻仍。果何自而然哉。比
年以來。元老大臣相繼而去。羣臣抗疏。謫戍編發。呂柟

馬卿等之降。過在可原。王相王思等之歿。情尤可憫。張
璠等倖取于捷徑。郭柟等遠逮于道途。莊田地土紛紛
奏索鹽商籍引。徃徃欽依錦衣衛之冒濫。弗覈御用
監之匠役增收。陳林等之權木。陸宣等之乞俸。先朝
弊政漸次踵行。此皆臣等學不足以格君心。誠不足以
動天聽。以致政多闕失。上干天和。乞將臣等罷黜。別選
賢能以克任使。則職業修而天變可回也。帝覽奏。原
之。俱報聞。先是郭柟以抗言被逮。人心危懼。而太監白
懷奏。筦山海關。廣寧遼陽房屋權取租利。給事中黃重
疏諫。不報。太監李能奏。權山海關商稅。御史劉潁疏諫
不報。故言等及之。

論曰自甲申夏月以前建言者直拾衮闕至此爲之一變云然引咎自列猶有占諷諫風至鄒公守益等效之蒙斥疏體爲之再變然丁亥以後在染之習成矣其張膽朝堂數及輔貳者亦不多得又三十年遂幾絕響故鄒林諸疏不于嵩而于其子也。

五月

附錄四川兵備副使余珊上言臣惟今日 神聖當天宜必有稷契伊周爲之佐者何 聖君賢相偶不值致陛下負堯舜湯武之資至今未有以成其大就其功歲月漸邁似不克終臣不勝感泣哀悼效唐魏徵謹陳十漸并致漸之由杜漸之方圖終之要爲 陛下陳之其

一曰紀綱漸頹。邇年以來。承平日久。事樂因循。政多苟簡。名實乖謬。而上下之分未定。官府異同。而陟罰之法未公是也。其二曰風俗漸壞。自用浮沉。一世之人。首掌銓衡。崇尚脂韋。賤薄名檢。是以諛佞風生。廉介日銷。至侯伯專彈劾。霸吏議禮儀。市門頗開。賈販仍舊是也。其三曰國勢漸輕。自許銘被殺。國典不伸。而大同倣尤動輒。嘯聚至使妖胡殺主事。庫胥殺縣官。殘賊戕方面。而九鼎之威。不重于朝廷是也。其四曰夷狄漸強。土魯番帶甲百萬。驅逐小王子。盡有其地。志吞西河。耀兵甘肅。而東胡蹢躅于邊海。韃靼蹂躪于沙漠是也。其五曰邦本漸搖。冗食之征。下及雞豚。造織之需。自同商賈。江

淮國於赤旱。母子相食。兗豫苦于剽掠。盜賊橫起。川陝
湖南之民。罷于軍需。竭于祿米。而銷骨飲恨。無復樂生
是也。其六曰。人材漸凋。呂柟鄒守益等去。而館閣空。顧
清汪俊等去。而部臺空。張原胡璫等歿。而臺諫空。間有
一二英傑。繫籍羈旅。復爲權姦擯錮。遘之不通。是也。其
七曰。言路漸塞。降心未懲。其忿逆耳。或動諸顏。不則說
而折人。以言卽臆。度而虞人以詐。朝進一封。暮授千里。
甚至三木囊頭。九泉含泣。是也。其八曰。邪正漸淆。論篤
將與儉邪投間。飾六藝以文姦言。假周官而奪漢法。堅
白異同。模稜兩可。王莽匿情于下士之日。安石垢面于
入相之初。周公孔子。誰其辨之。是也。其九曰。君臣漸睽。

自大禮議起言人人殊邪佞相觀巧發奇中至是大臣
顧望小臣畏慙趑趄嘖嘖載鬼張弧是也其十曰災異
漸臻東南洪水溢沒都城西北赤地亘連千里劇賊起
山東餓殍滿江北遼陽軍婦產子兩頭無極赤風晝晦
如夜是也凡此十者天子有一無以保四海况兼之乎
陛下縱上聖之資乘興王之運可致之祥宜無不得者
何以獲此無乃相臣召之與今日內閣首位果稷契伊
周之佐乎抑平勃房杜韓范之流乎徒以姦佞伴食怙
寵臣逆知其非天下之第一流矣此臣不去則紀綱益
頽而風俗益壞國勢益輕而夷狄益強邦本益搖而人
材益凋言路益塞而邪正益淆君臣益睽而災異益臻

矣臣請陛下亟去之更求應變幾神如楊一清木強重厚如石瑤者同置左右斯弊政可除人才可用矣疏入報聞。

六月作世廟。

初席書上廟議有曰親盡之期與孝廟同。帝問其故。書對曰我朝德祖比后稷太祖太宗比文武皆百世不遷懿祖以下隨世而祧。獻皇帝與孝宗同世親盡同祧。帝曰別廟不與祖宗序列他日奉祧藏于何所。何以伸朕世享之情。其再議之。書上言宜藏主寢殿歲暮出祭如太廟議。帝曰皇考生朕一人入繼大統。今特立廟。世世不遷。伸朕孝思。乃

命工部相地于太廟左環碧殿旁立廟前殿後寢一如太廟而微殺其制路由闕左門入已而命定廟名曰世廟。

附錄錦衣衛革職百戶旗校季金崔玉王邦奇閻安等屢疏辯復原職下兵部勘覈尚書金獻民等查據被革緣由上請帝曰閻安等五人原因營建定祿廕陞准復原職內崔玉蒞任理事季金等各授署百戶帶俸不許夤緣管事重復奏擾此外亦不得比例陳乞金獻民等上言全等怙姦奏辯一日而復九十餘人是以左右一二人之私壞祖宗百餘年之法也乞復革斥以息人言消天變給事中鄭自璧亦上言全等被革之初。

明詔有曰妄奏者編戍邊地宣之綸綍威如雷霆布之朝野昭如日星相去幾何盟約已乖威明之旨旣成虛文鑽刺之心必無止足汗號已渙而復反國是旣定而復搖此中外所以扼腕也乞將全等革職下吏問遣亦不報。

秋七月以僉事席春爲翰林院修撰僉事劉夔爲翰林院編修。

先是吏部以御史孫元席春劉夔皆當路子弟請改別官帝命俱授按察司僉事然席春書弟也書見弟外補心懷舐望邀寵蔓連章排大學士宏等留中不下書乃上疏爲弟乞恩改授館職帝遂命春爲修撰夔爲

編修給事中鄭一鵬上言。爵賞利器。不可以假人。威福大權。不可以下移。命令大信。不可以反汗。三者失一。不可以爲政。正德間。傳乞雖多。文臣清秩無有也。且先朝弟子爲臺諫者。多授行人司職銜。其有一二改入翰林。俱夤緣所得。當時益稱旋卽外補。當春之改官也。書胡不引行人司例。顧授纂修可乎。書自負議禮偶合。聖意遂恣行胸臆。凌轢縉紳。初因其弟改官未厭。大懷怨望。合璵萼以輕構大臣。旣而其疏留中。復爲弟乞憐改求館職。向使春不外補。璵萼之疏必不上矣。是書挾私誣構。專恣詐欺。璵萼其爲鷹犬無復忌憚。平生姦僞洞見真情矣。乞將書罷斥。將春鞫問削籍。其璵萼挾奏

事理明下。廷議別曰是非。取自上裁。庶公論不昧。而仕路永清矣。帝切責之。

八月梁儲卒。

贈大師諡文康所著有蔚洲集。

九月逮繫元城知縣張好古詣京。

元城泰和伯萬言故里也。其弟侄在里中橫奪民田。好古收而箠之。復爲置獄。萬言以聞。帝命逮好古詣京。考訊。御史李高等上言。宜將好古行撫按官按覈。或至京下吏勿付詔獄。庶守令之氣不摧。戚畹之恩亦全矣。報聞。

林俊卒。

初俊疾篤上言身後祭葬通乞停免以爲存歿之安因
言議禮諸臣見各不同存卹叙復宜早降溫旨以慰幽
明又聞古者撻人于朝與衆辱之而已非欲剝其體膚
致之灰地臣猶及見成化初廷杖容令厚綿裏衣重襁
疊帊至正德初逆瑾用事始啟解衣之端非所以待士
人存國體也釀成末年撻灰之慘幸遇新詔收卹士
氣始振不謂今日復罹此苦臣又見成弘間詔獄惟叛
逆妖言強盜故殺人始有考訊之旨其餘常犯或下鎮
撫或付法司情重者始有白復之旨部寺覆奏始有降
奪之旨今則一槩考訊無復低昂恐非祖宗仁厚之
意也臣又見邇年以來故老舊臣謝遣殆盡朝著爲空

伏望 聖明留意禮致至如碩德重望如羅欽順王守仁呂柟魯鐸輩尤宜引用以裨 聖德疏入報聞俊尋卒。

冬十月議 廟街。

初議立 世廟由闕左門入署丞何淵上言宜從 廟街門入意謂 國制左 祖右社言社則稷在其中言祖則禰在其中社稷尚得合祭祖禰乃不得同門邪。帝命禮官集議禮部上言若直通廟街必撤垣伐木毀神宮監乃可請 命官度之給事中韓楷御史楊泰等俱劾席書依違持兩端學士璵夢上言宜由廟街門因雜引儀禮爾雅及古禮圖徵之以排禮官考禮弗精復

畫古圖及廟街宜通之圖以進。帝下之禮官命復集議。大學士費宏賈詠石瑤力諫不聽。給事中衛道主事曾存仁復各論辯。帝怒奪其官外補之。書等仍請乞從前議由闕左門。帝曰仍由廟街門。但于神宮監北量撤旁屋容通板輿而已。書與兵部侍郎胡世寧復力言不可不報。

十有一月以楊一清爲吏部尚書。武英殿大學士叅預機務。

初御史吉棠奏召一清入閣復起彭澤代一清總制章下吏部。大學士費宏奏召謝遷席書上言。一清宜復內閣而宏舉謝遷所以阻一清爾。吏部外牽干臺諫內媚

平宏惟斷自聖心可也。帝從之。乃加一清少師兼太子太傅入閣辦事。

十有二月乙卯朔日有食之。

席書上大禮集議。

帝命頒賜藩府及中外羣臣。仍令各省刊布以傳。

進席書太子太保。以張璁桂萼爲詹事府詹事。方獻夫霍韜爲少詹事。

以大禮成也。璁萼仍兼學士。獻夫韜仍兼侍讀學士。廷議諸臣加恩有差。于是費宏進少師兼太子太師。謹身殿大學士。賈詠石瑤進太子太保。武英殿大學士。

閏十有二月。

附錄御用監太監黃錦上言。乞敕南京御用監及南京工部各遣官一人。揀印蕪湖及龍江瓦屑壩椎場竹木。管運赴京。帝從之。工部執奏不報。給事中黃臣上言。力爭。亦不報。

金獻民罷以李鉞爲兵部尚書。

獻民因措置土魯番未善。爲言官者所劾。自引去。以鉞代之。